

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

6

T3194/4634.85

山

盧城縣志

漢盧城故城在縣西北三十里興平元年置晉太康

移石陽縣故城在縣南一里咸康末太守孔倫

改石陽為盧城故城在今吉水東北唐開元間廢

按盧城故城在二一漢晉時西晉太康中郡移石

城廢一東晉咸康末太守孔倫所築隋開皇五年改郡

古州城故城在縣西北三十里興平元年置晉太康

城在縣西北三十里興平元年置晉太康

吉安府志卷九

山川志

古蹟

廬陵縣古蹟

漢廬陵故城在泰和西北三十里興平元年置晉太康中
移石陽晉故城在本縣南一里咸康末太守孔倫築隋
改石陽為廬陵縣故城在今吉水東北唐開元間廢
按廬陵故城有二一漢舊縣西晉太康中郡移石陽
城廢一東晉咸康末孔倫所築隋開皇十年改郡為
吉州城始廢各志互載未明今詳建置門城池志中
撫口城在縣北七十里陳永定元年廣州刺史蕭勃遣其

哈爾濱大學漢和
圖書館珍藏印

子攷及其將歐陽顏傅泰等將兵出南康傅泰據撫口
城周文郁使其將丁法洪攻泰擒之明一統志
大臯城梁大寶中李遷仕築陳霸先遣周文郁據大臯遷
仕潰走

按寰宇記稱城在泰和縣北八十里東臨贛水今泰
和北三十里抵邑界又三十里為邑大臯渡城當屬
廬陵汪會龍古城廟碑大臯渡對岬稱伏羲墟古城
所由名也或曰陳武帝居南康崎頭廟於此地因名
意即霸先據遷仕所築寰宇記汪碑似俱失考互見關隘
東昌城在今永和市吳後主置屬泰和隋廢唐貞觀五年
析隸廬陵

敖城在宣化鄉永新界

按明解縉記云廬陵敖城為孫叔敖故居斷碑殘碣
往往出於荒榛瓦礫間秘於私家子孫相傳今千數
百年予猶及見其一二得以補聞見之遺林旗峰有
故城猶有叔敖名之句互見關隘

故吉州碑州在石陽之後郡移城廢碑沉江中水落猶見

大業等字

續通典併吉水志

廢城門明洪武初割城東北隅廢澄波崇惠清賦平利凝
歸望雲六門外如下塘龍門猶存城址

古縣治在郡治北

蒙古字學遺址入慈恩寺元至正癸巳廉使納速兒丁籍

沒蕭文鳳田三千石贍學彭鉉記 失載

紋錦局在今縣治所元時置延祐六年移縣治於此改局城東

萬戶府在郡治東北宋貢院地元廢為府即今小教場明正德間都御史王守仁為故守劉實樹廉節祠

吉州貢士莊在宋州學後尚書胡槻創儲米以應計偕士文天祥記

記云物之在天地間自銖粟以上莫不有主名獨貢士莊所儲以擬夫三歲大比士之送上春官者有司不知誰宜得之取什伯於千萬亦無敢自必為已得其予奪之殆有物焉逸史稱隋末一書生所居抵官庫有數萬

錢欲取之神人訶之曰此尉遲公錢也泉者天之利器惟天能以與人則夫任貢士莊者殆為天守利器以俟夫天之所以與人者克是心以往真無所為而為之其為仁豈不至而為義豈不盡乎咸淳六年簡池趙君必禰來為廬陵教授作興斯文教養畢具則按貢士莊之舊稽其所出內歲錢穀幾何廬陵士甲江右一科數路資送四五百人哀多益寡稱物平施末之云耳於是增田之議一之日置尹氏租為米八十斛二之日置彭氏租為米一千一百九十二斛趙君猶以為未足則日傳而益之其來者之事哉添差教授番陽程君申之繼至相與詣郡請蠲賦吏持難易擱弗下永嘉繆侯元德

甫下車二君申其請侯慨然曰奈何與吾黨校瑣瑣乎復之不崇朝予聞而異之以為侯與廣文之用心皆所以奉天道之不及者也古之爵人言必稱天國家謹惜名器自他蹊者悉名僥倖惟進士科使四方寒畯操觚而進付得失於外有司而定高下於殿陛之親擢公卿大夫繇此其選當是時天子宰相一不得容心於其間予嘗謂今世惟科舉一事為有天道行焉士修於家試於鄉如探籌然以信夫天命之所遭而為貢士計者積倉裏糧於其道路先事而為之備隨天命之所與而後與之是心也豈復有內交要譽之私哉予故曰皆所以奉天道之不及者也是宜書且夫取士於天下將以為

天下用人之常情其窮也不為利疚則其達也不可以非義屈後之臨大節斷大事決非異時簞食豆羹見於色者之所能也夫使郡國上其賢能而漢人續食之意隱然寄於學校士得以直走行都而無僕馬後顧所望於人也輕則所以全於已也大是邦學者世修歐周之業人負胡楊之氣如有用我執此以往是舉也世道微有賴焉蓋益可書也已

是莊創始於尚書胡公槻隸於學者米二千二百斛有奇前丞相葉公夢鼎為郡增六百三十斛有奇前教官黃君愷伯增一千三百六十斛有奇前趙侯典楸增四百一十斛有奇自二教創後施君郁鄭君師臯增二百五十斛有奇合今所增通為米

六千一百斛有奇以學諭提點莊事劉少南張敏子云
八年八月記

右司理院吉州凡三獄曰州院曰左司理院右院其一也
舊志

宋文天祥獄空記云吉州右司理院開慶元年五月獄
空九月又空明年五月又空吉為州凡三獄曰州院曰
左司理院右院其一也方千里之國未易為理而物之
不齊其情固然省刑罰止獄訟賢者雖欲為之而格於
其勢之所不可長老傳說以為自南渡百餘年惟乾道
庚寅嘉定甲申獄嘗空乾道事不知何如嘉定間南昌
張別駕被旨攝廬陵郡初張宰清江得米南宮獄空二

字勒諸珉以訖不朽洎來吉摹本遍付諸獄不三月遂
皆以空告由今推之謂長民者一念之善感召和氣可
也上有所好下從而逢之是未可知夫以百餘年兩見
之事可謂稀濶而其可疑又如此然則雖謂之絕無僅
有可也今司理君為政寬允嘗平反死事二法應賞君
不自以為功當路論功亦不及人謂君超然利害之表
君曰吾盡吾心而已而何賞之較君實有愛人利物之
心哀矜庶獄無所不用其至人人自以為不冤獄空遂
為常君書三考候代者未至歲月有奇獄空之事其二
在考內其一在候代時院之設久矣官此者幾人得闕
而來受替而去其間可紀之盛百餘年僅僅兩見今君

受任三考已能配此曠絕之蹤而書滿已後迄臻三美
君職於其事可謂無愧矣此而不書後將何觀雖然予
嘗上下世變觀之自畫象之化遠人心之樸日以散惟
成康時曰刑措不式漢文時幾致刑措下此則唐初死
囚歸獄之事人以為竒蓋唐虞後至今三千餘年而斷
獄之省數不過三四海之大兆民之衆不可以一院比
也然聖人得國而為之持之以道使民遷善遠罪而不
自知其效驗近卜於期月三年而遠亦不過於必世夫
古今刑措之日既如此其難而區區空一院之獄又如
此其不數聖人之志其遂不可行耶雖然由君之事則
百餘年間職業之可書曾不一再而君以歲月為之有

餘天下事信不可為乎神而明之存乎其人此予所以
初為世道感而以其尚可為者深幸也嗚呼君其毋以
自足哉君姓洪名松龍嚴陵人

回仙酒樓在府前舊有樓相傳呂洞賓游宴其上後因樓
址為回仙觀今廢

晏稽古詩云回仙一去事悠悠尚有城南舊酒樓兩袖
青蛇餘膽氣十年黃鶴縱神游狂呼太白浮盃面醉喚
阮公數杖頭幾度月明翻鐵笛恍疑身在鳳麟洲

明秀樓宋紹興間僧季高建明永樂壬辰邑人顏子竒與
其八世孫原方善又為之記 失載

宋周必大詩云心得高明趣樓臺井邑間巡簷風與月

隱几水兼山景物因天巧軒窗占地慳寒暄俱可至徙倚不知還

賞春樓不詳所在太守李琮通判徐向嘗會飲樓中倡和按葛敏修詩序云太守來飲賞春樓使旆未至徘徊

白鷺洲亭然則樓與亭相近也

舊志

山曉樓在東北城上宋文天祥書江西第一樓匾國朝知府郭景昌知縣于藻重建

譙樓宋時建理宗時邑人劉平仲子華收海寇有功授兵部尚書詔尚寧公主駙馬還鄉建御翰樓於樞塘

時雨樓在南關仁壽山明萬曆四年丙子知府張振之建時學宮甫自北城徙建樓成規制益壯會歲旱振之禱

雨得甘霖邑人陳嘉謨因名曰時雨併為之記壬辰學

宮遷復北城故址樓尋廢

記詳縣志

迎仙閣在永和鎮宋紹興中邑人蕭唐卿建寶祐間文天祥書迎仙閣額元滕玉霄有記明崇禎間燬國朝雍

正間建復乾隆二年丁巳何之華記

何記畧云鷺洲西南十餘里為永和長江繞其前神岡峙其左巒林秀美形勢最勝其間有閣曰迎仙考其所自則宋紹興中文學蕭唐卿手創寶祐間丞相文天祥書迎仙閣三字於其上翰林待制滕公玉霄嘗為之記自是四方騷客文人莫不登臨攬勝徘徊留題由宋而元明歷四百餘年迄崇禎甲戌閣中懸鼓忽墜聲聞於

外閣三日閣燬於火 國朝承平將百年雍正間唐卿
之後裔瑞徵慨然有志興復乃捐金為倡爰規舊址築
垣墉閣廣若干丈高倍之斯固其族共勦厥成瑞徵實
經始也工既竣屬余為之記因慨然曰士君子不忘根
本雖前人一草一木猶珍重不敢置况是閣之建於先
世者哉繼此來遊來歌於其上者溯文山之墨潘能不
流連於蕭氏之源遠流長與神岡鷺水同其悠久也耶
時乾隆二年歲次丁巳

按廬陵舊志載迎仙閣大德六年建文天祥書額攷
大德為元成宗年號何以額書於宋滕玉霄元人記
失載今據何記更正

詩人堂在龍岡西原能仁寺側唐司戶杜審言結詩社於
此宋淳熙三年周必大與危恕齋歐陽寓菴買地西原
八泉勝處構祠祀司戶一時知名士及門弟子集此行
鄉飲酒禮後約山朱漁通守王邁巽齋歐陽守道議置
膳田扁堂於龍岡名詩人堂元廢入本寺明陳嘉謨輩
建西原會館仍置田講學於此今田租歸白鷺洲書院
明周巽亭詩云詩人堂上客載拜杜叅軍大雅今誰繼
高風自昔聞愧來花外月吟斷樹間雲千載龍岡會因
詩倍憶君 國朝王芭濱詩云君不見南有貢士莊西
有詩人堂堂在八泉最深處醉筇吟袂橫龍岡我聞杜
司戶置社足千古陳榻時教懸日月管席那曾割風雨

又聞周益公犖犖追殊蹤布衣之游此為始他年烟月
猶識翁識翁舊作詩人冠此堂依然足清玩春花明娟
秋月圓多情祇恐詩人散興盡當復來何代不有司戶
才雪車冰柱相間作苔網花牋取次開盡日橐筆訪名
勝欲問此堂安在哉

按舊志知名士下語多生澁今釐訂又廬陵志載縣
北坊廓鄉有吟溪亦以杜司戶得名明周忱記云城
北吟溪橋陳氏世家其傍郡志以為唐詩人杜審言
為吉州司戶時嘗吟詠於此故溪因以得名橋建自
元時陳長者仲方橋有亭其族環溪所作翰林滕玉
霄書 按司戶以一詩人風雅而後人名堂名溪名

橋地與俱韻明曾鶴齡詩云吟客倚闌仍眺望行人
題柱莫淹留吳雲詩云司戶久留風雅韵少陵應有
聖賢篇皆因司戶志懷併互見於此

垂芳堂在淳化鄉宋文天祥為鄒文叔題併記

記云吾鄉上游有佳木連理生於鄒公長者之地不知
幾何年益公取以補廬陵圖志木濱水如老蛟天矯有
騰驤怒起之勢咸淳八年秋一夕大雷電以風木隨水
而飛又二年秋有蓮一蒂雙花出於文叔北窻下苔池
中文叔長者曾孫也連理表章於乾淳間鄒氏始享有
其瑞予聞長者一再傳皆恂恂友愛同氣並根既碩且
蕃實生來仍今文叔之庭二季競爽兩孫並善天將昌

之其殆視同穎兩岐細緼塊北而未有已乎文叔喜而命予題其堂曰垂芳夫一草一木之微比於太虛僅同毛髮而鄂不韡韡兄弟之親小雅之所為賦也於吾心得無感乎予旦夕當徘徊斯堂為君賡棠棣之一章百歲堂在淳化鄉新安宋咸淳九年山長羅畊祖母蕭氏百歲文天祥暨交朋升堂為壽與橫舟昆弟子姪舉酒盡歡酒酣賦詩

詩云麗日萱花照五雲升堂風采見乾淳蓬萊會上逢王母婺女光中見老人雨露一門華髮潤江山滿座綵衣新只將千歲苓為壽更住人間九百春

予隱堂明永和王起予築劉崧記

記畧云起予以康強之年際隆盛之治享甘旨之奉而游咏乎堯民淳和之天故其居於是也八窻靚虛一塵不生市喧既遙山色逾淨時當春草幽芳夏陰岑寂盼浮雲之斂舒耳鳴禽之上下良朋萃止則命觴投壺以樂之清風徐來則薦琴咏詩以娛之凡世之憂樂毀譽得失曾不足以櫻其中而自無不得焉若是而專之而謂之予隱果孰得而爭之哉

逸清堂元楊景開建留國公廣徵書額程文海記

記云廬陵楊巽溪之季景開余舊也官淮西以歸復與余會中臨別有請曰先子和州之事往公賜之袞袞既藉以不泯小子問因先廬闢之堂今太師留國公辱書

其扁逸清而未有記也願公詞翰之暇終惠之余嘉景
開之肯堂與廣微之名筆喜而記之曰美哉斯堂也斯
志也而人鮮久矣蓋樂莫樂於逸而嗜於營逐者弗暇
愛也高莫高於清而畏於寂寞者弗能居也二者同體
而相成顧何逸之非清亦惟清之故逸然非守志勵操
者則不能與於斯吾夫子稱古之逸民而中清者虞仲
夷逸正信乎其鮮能也抑孰知夫天下必不可無此人
人之生必不可無此志世無此人必不可勵風俗人
無此志何以存名節張子房不愛三萬戶而愛黃石赤
松之約陶淵明寧辭五斗粟毋寧負故園松竹之盟後
之論漢晉人品者莫高焉此逸此清也人能安吾逸守

吾志仕已必不見於色寵辱必不驚於心必不為書咄
咄之中軍必不為推不去之謝令必不貽譏伴食取笑
痴頑矣雖然鶴書赴隴草堂之蕙帳難留驛使及門東
山之絲竹將有所未暇宰物者不斬人以富貴而斬之
清福余又恐夫斯堂之席將有時而不暇暖矣抑出處
天也懸於天者聽於天逸清在我者也存乎我則不可
易乎我若予之修職玉廬清則清矣其如求逸未獲何
時畢吾願賦遂初歸訪泉石重與景開笑傲於青原白
鷺之間豈不幸哉

讀書堂在永和鎮宋蕭子信建胡銓書額元重修歐陽元

記失載吳師尹有我題新詩鳳岡麓鳳岡春水年年綠年

年書聲蕭氏屋之句明洪武間增修解縉胡廣各有記
失載 國朝雍正二年蕭台儒蕭瑞徵重建

卷舒堂宋劉梅溪立歐陽修書額

德基堂在永和鎮為鳳岡精舍講堂元延祐間與精舍同
建明洪武間稅課使魏秀廬陵知縣王泰重新里人蕭
同文董其事王禮記 國朝乾隆五年蕭有進等建復
精舍為鳳岡書院堂額仍舊

虎溪蓮社堂宋咸淳二年靜觀居士蕭某建劉辰翁記

記云方山在青原東東山西瀧江出其左村江出其右
方山之泉出山下山東為峽委蛇循峽左右赴二江是
為虎溪元年冬十二月予避地虎溪主蕭氏諸君幸哀

我館且穀我予惟世方亂蓬蘩而行蝸牛以居揭揭焉
載其木主而無所可祭一日步行田間得精廬曰蓮社
欣然蹶然就而躡焉社友十餘中堂高潔佛祖咸在道
人覺就可晤語請記予謂道人蓮社本遠公廬山廬山
前則一虎溪也遠送客未嘗過虎溪謝靈運求入社不
納而往來淵明山水隱映醉醒兩相得非以其徜徉方
外世味薄耶淵明為叅軍六載縣八十日予塵居寡諧
非無意斯世名穆陵進士十又五年獨嘗教授中都百
六十日罷又三年起從廬山公江東七閱月從江東得
掌故入修門四十五日以憂歸歸又七月年正當德祐
初元五月召入館辭未行十月除博士道已阻歲晚自

永新江轉入虎溪留虎溪三月矣十月之間仕已如此
去年廬山公以節死謚文忠惟予與同年蕭獻可皆公
客相對感念離合出處流落惟師友之故而予猶以迹
似淵明獨誦其詩辭百世下髣髴求一語不可得長此
愧恨天其以予畸於彼而合於此牽率山水至此逋播
耶何虎溪同蓮社同道人相得又同今為此堂記甲子
則予與淵明命也亦本無高處正自不得不爾八表同
昏平路伊阻誦停雲此語淚下霑土何能無情此堂起
咸淳二年靜觀居士蕭公某創為之獻可其弟是年為
德祐二年二月戊午社

福善亭在福善橋上明陳嘉謨記

載失

正氣亭在螺子山忠義祠前明正德三年知縣鄧鑾有石
刻丞相年譜諸忠義小傳

南亭在南柵門外今廢

明知府莫知已詩云飯犢耕耘願已違聞鷄起舞欲何
為風塵開闔吟魂斷天地陰晴病骨知錦里家空歸計
拙玉關人老上書遲自憐不及沙頭鴈春去秋來有定
期

三秀亭在西峰寺舊名秀野亭知軍魏綸改今名宋黃庭
堅記

記云廬陵比缺守輒以他吏攝承託宿傳舍吏胥視民
為俎豆執鞭者衆羊失其牧歲歲仍饑饉夜有枹鼓不

治聲聞京師元豐六年春詔用壽春魏侯綸侯有家法以吏能名一世至則引見官吏問救敝所先下氣教民諭以苦語獎拔材能招勸不勉戒飭宿魚聽以功除按行州左右曹三獄累械至三百餘決其得情引慝釋其點染攀牽惟上請須報遠逮證左與繫輕而捕重者乃付有司其所裁遣蓋去三分之二二人氣以和下車之十日芝草二本產於州院獄門之東其後得一本於郡齋便坐之室而最盛於西峰僧舍之秀野亭一月之間凡產芝二十餘磊落權竒人物象成最後寺僧來獻黃芝異本同穎黃者慶色異本同穎者不爭之祥今郡侯教養斯民天澤優渥五穀順成抄盜其將衰息健訟之民且化為慈祥弟友魏侯亦將鴻漸於臺省以受福民之慶則靈芝之生不獨為吉瑞魏侯因改秀野亭以為三秀屬豫章黃庭堅記之魏侯名綸字君俞其歲之六月甲戌記

山月亭在南湖上高處即今萬翠巷車駕嶺宋王信臣建呂忠公謫居嘗遊焉楊萬里記

記云余昨日偶出山門入州府友人王信臣迓余於中路約余過其家觀所謂山月亭者日已旰未遑也詰朝夙興出永豐門西走九曲巷謁親舊皆寂寂門未啟則返而南謁信臣門啟矣余入坐賓階有頃信臣攬衣卒率而出是時風雨昏昏淖淖沒膝余語信臣曰今日遂

有遺恨鄉也山月亭不遠五十里見我於圖畫之中今也尺有咫乃隔我於風雨之外信臣曰先生毋恨則前行導余徑其家繞出屋後折而左度修廡陟窮巘有亭若在天半掀然孤巉者山月也余且喜且喟曰尚有遺恨已識王仲祖未見杜宏冶所謂雲端臺者焉在信臣指前檐三十許武石欄崛起階齒層出者曰此是已雨小霽欣然登焉直下百尺壁立如削闐闐數萬家如在井底下視膽掉遐矚神曠乃知此亭面勢宅一城高絕之地無所與比其前峭秀而邃蔚者青原也其左突出而翼截者東山也其右首下而尻高者拜相山也其下曠厲而皎空者白鷺江水也周覽未既驚風飈起林木叫呼水波怒跳翻倒城市前山皆動諸峰相角清寒入骨不可復立亟歸亭上余益喜且喟曰尚有遺恨今夕無月

蒼然亭

缺註

宋文天祥詩云己卯六月初一日蒼然亭下楚囚立山河顛倒紛雨泣乙亥七夕此何夕煌煌斗牛劍光濕戈鋌慧雲雷霆擊三百餘年火為德須臾風雨天地黑皇綱解紐地維折夢歸媮生自為賊英雄扼腕怒須赤貫日血忠死窮北首陽風流落南國正氣未亡人未息青原萬丈光赫赫大江東去日夜白風打船頭擊夕陽亭前老子舊胡牀青雲過去關山動白鶴歸來城郭荒

忠節風流落塵土英雄遺恨滿滄浪故園水月應無喜
江上青松幾許長

凌波亭在站前南唐嗣主詔民造競渡船每端午官給予
綵使角勝勝者加以銀椀謂之打標開寶八年盡鬼其
人謂之凌波軍宣德間知府陳本深重建今廢

宋王庭珪詩云軒角當南極檐牙聳北城嵐光浮水面
濤影撼城闈

取亭在金牛泉上湖西道施閏章建有記

見金牛泉

雙秀亭在永和市宋文氏建

宋周必大詩云身在江湖欲看山山行還憶弄潺湲誰
知裏許雙竒絕碧玉青蘿一望間汀蘭煙樹兩佳哉

六曲屏帷坐上開南浦彩雲飛畫棟西山爽氣任朝來
澄碧修眉固自竒只愁門外苦喧卑要知心迹雙清
處須待人稀月上時

覽翠亭永和曾思濟構

謝矩詩云春陽育萬物蟄雷發新聲衆卉既已蘖羣草
亦復生鮮鮮秀色映長坂苒苒光風轉人眼重叠蒲錢
綠水涵蒙茸天棘青絲綰空庭交翠飛紫煙臨軒悵望
心怡然榮枯妙理在窺測寒暑大化更推遷讀書臺前
春似海丞相宅邊青不改故家才子今卜居猶憶當年
舊文采我來攬翠當陽春綠陰門巷飛香塵被酒橫眠
松製幄哦詩匡坐草為裯年年東風二三月快靚青青

垂柳色青青垂柳絕可憐慎勿攀條贈離別 王輝詩
云亭倚古臺邊環亭翠蔚然芝蘭深雨露梧竹老風煙
牕戶香霏濕闌干爽氣連登臨忘世慮逸興發林泉
清都臺在永和鎮宋蘇軾書字

曾鎬詩云兀坐豈不佳偶出亦良適高臺挹清曠况此
好風日俯憐波面淨仰愛松聲直灑落萬古秋飛鳥度
晴碧徘徊足瞻眺蕭散謝羈馬浮生眇塵端一醉不易
得古人豈其遠千載猶宿昔清風何寥寥愧此臺上石
講經臺舊名讀書臺在府學西宋慶元三年教授于望立
并記元廢明宣德間知府陳本深修正德三年知府任
儀重修乃名而記之 二記俱
失載

古青原臺在郡城東南隅政和間太守程祁建刻太守鄭
作肅尚書劉才邵詩於柱牆壁有本郡前賢科名仕宦

石刻今改鐘樓 詳建
置

蘇黃臺在永和市宋黃庭堅送蘇軾過此故名

按蘇東坡過郡非黃山谷令泰和時辨見別卷二公
先後至此錫以此名亦可但綱語特附會耳姑仍之
鐵十字在城南排岍司前長七尺右題保太二年五月日
置左題重一千三百斤下潭水中復有一十字水清淺
時可見明初鈔關在龍陽閣下面對河東古樟用鐵十
字以挽橋鍊

明晏稽古詩云十字橫江鐵鍊成海艘維繫力非輕赤

鳥鑄就交加體大冶流來二五精日色迷空虹影澹土
花蝕雨篆文平忍經折戟沉沙地說著前朝百感生
滕國武愍李公廟碑出泮宮前後人繫之以辭

辭云故太保滕國武愍公之下廬陵也雖以忠節故邦
文丞相鄉國又當忠勇偏師挑戰之後公不疑不怒按
甲入城城中老弱不知革命於反掌間其所活廬陵之
人不知其幾及文丞相檄江鄉士大夫舉義興復公盡
得其所檄名籍而焚之其所活廬陵江西之人又不知
其幾蓋至於今亦幾閱五十年矣廬陵之民夫婦父子
長子老孫且四世安知有當日若江西宜愈遠愈隱矣
向微泮宮前碑其誰知之蘇代有言龍賈之戰岍門之

戰封陵趙莊之戰秦所殺三晉之民數百萬今其生者
皆死秦之孤也死者之孤其怨毒如此則生者之子孫
其德豈有涯哉公有大勲勞於國而公不自知所以陰
壽國祚者固不為其家也而天且厚之矣公之冢子世
安以賢相聞於江西公之仲子世雄以賢帥聞於豫章
公之季子世顯以賢守聞於廬陵此天報之也人豈能
報公也哉人之所能者惟廟祀而已

按右載劉申齋集郡志逸而不書恐終翳武愍之功
故特存焉

文德里在儒林鄉永一都元時里士潘九思謝玉淵曾晦
儒感志勤業以顯當世秦定里士滕玉霄書文德坊表

之

歐桂里在林四十三都宋歐陽修伯祖儀進士及第里閭榮之改安德里為今名

尚書里明周忱故居在山前

連理木在儒行鄉三山曾季淵宅二木隔道連理宋楊萬里書六大字曰殊本連理之木

宋文天祥詩云皇后嘉樹生僑僂四衢五衢合一軌德澤純洽百方一乘木而王固如此大明香琴橘貞觀玉華李一時圖傳傳竒觀榮華過眼轉九易惟有武城宅前樹不知何年已連理從來縣官不以聞武城子孫世專美人言協氣薰嘉生此家孝友陶協氣朱門多少鎖

喬木百年瞬息滋一喟焉得鼎鼎為輪困受命不遷相曾氏傳聞此木更八世方遇麻陽大夫記麻陽又幾年卻入青螺地輿志比來徹當路表名連瑞理有日捧圖上嘉禾靈草共青史物生隱顯殆有時展如之人亦應爾梗楠杞梓離竒生繼此廬陵城北不止稱三瑞明夏霖詩云百年瑞木倚雲端六月天風作夏寒形影渺隨塵土化根株惟向畫圖看諸賢賦咏名俱在奕葉收藏子獨難却恨無因覩蒼翠臨題撫卷重盤桓

廬陵竹室見房千呈記

麗澤齋范朝宗建

三瑞堂在府治中

二友堂在府治後

詠歸亭在興賢門外

朝霞閣即今白鷺亭

言子所志 卷九
秋月寒江亭慈孝堂俱在永和市

江村小隱在神岡

萬卷樓在印岡

按虎口石縣志不載通志云在縣北百三十里臨贛
江非今廬陵地仙女梳妝亭通志稱昔有仙女來戲
池中事涉不經今俱刪

蓮花廳古蹟

琴亭在廳治西琴水上即今蓮花橋亭相傳唐相姚崇於
此操琴

明江玉琳詩云彈琴人去是何年尚存曲澗邊相
葉一時垂鼎鼐聲華千古動山川秋風別調傳金昊夜
雨餘音漱玉泉寄語山靈同愛護鳳臺今已盛雲煙

國朝同知李其昌詩云亭圯經何代遺音尚未終我來
尋古蹟高調慕唐風洗墨雲岕裏彈琴石礪中月明還
共照幽意許誰同

讀書臺洗墨池在一都書堂嶺臺有遺址池水不涸相傳
唐姚崇讀書處

國朝孔興源讀書臺詩云迥凌天柱古臺荒自昔藏修
擬墨莊紅雨吹來曾漂麥綠芻老去欲亡羊案頭卷冷
青邱秘簾外星沉太乙光千載謳吟懷相業石壇宏敞
鳳廻翔 李其昌洗墨池詩云白著揚亭空洗墨玉壺
池色最分明寒凝花露縈香篆碧瀉松雲繪素清已化
龍賓歸鳳沼猶餘鶯費艷山城讀書臺畔天光迥可挹

吉安府志 卷九
澄波點石泓

廣興城在一都永新誌未詳遺址

仙人杏石壁詩題在一都元陽觀側杏傳楊仙手植有巨
人趾在磴道中長各尺五石壁楊仙以鐵筆勒詩道人
苦遊客剗去之鑿痕猶存

詩云飛過元陽撫舊栽琳宮幾度杏花開洞天怪我多
生別五百年間又再來

澄潭二字劉仙人鐵筆在六都瀑布巘石壁上字大如斗
三根樹在十一都溶湖村南唐顏詡手植三根鼎立丈餘
合為一復分為三寄生者似樟似桂至今蕃盛舊志
斑竹鋪在二十都明解縉過此題今名里人江玉琳見之

題詩一絕後縉復至竒其詩薦列博士弟子員

詩云誰寫斑竹鋪銀鈎鐵畫長仙人何處去翰墨有餘
香

留帖閣在二十三都唐曹叅軍李懷琳絕交帖為安成
張氏所得獻於邑令楊廷筠楊去任緘付劉元卿置閣
於復禮書院藏之故名明鄒元標記

記云唐曹叅軍李懷琳絕交帖更千年矣流傳不知
凡幾姓所可考者最初為韓平原賞識其後劉燾無言
鮮于伯幾咸甚寶愛而燕山張氏得之安成彭伯圻又
不知得自何所曾幾何時為劉氏志達所有劉氏傳之
張御史張御史之子尚寶君既沒或持是帖獻楊侯侯

受而藏之曰此安成重寶也吾當為安成存之已而內
召緘付劉聘君託以守聘君曰侯以不貪為寶吾亦何
敢私遂置一閣於復禮書院之後藏帖其上閣成聘君
袖帖過予請為記予開函披視則諸名公後先題跋甚
富有以為懷琳倣嵇康書者則湯君載也有以為懷琳
摹右軍書者則文待詔也而羅公廓氏則直以為右軍
真筆蓋謂卷末有梁天監進入年月及批湘東所進云
云乃梁武時湘東進入右軍真蹟而武帝親為標題乃
爾其言殊有據然以予觀之從來稱懷琳帖者斯又何
也豈李所藏書遂誤為李書耶不然似當以待詔之說
為勝夫懷琳善贗書則書賦書史及張睿餘論諸家所

載甚明即天監年月及梁武標題安知非摹倣故予以
為待詔之說勝也然無論王右軍李參軍總之稱寶矣
楊侯委千金之寶如讓搏黍其識度過人甚遠而聘君
處置得宜皆自寶其寶而不以古蹟為寶者夫古莫古
於吾心此豈獨千來年即上古軒虞姬孔所嘗經用故
物也心存則寶存否則亡二君處此求勿喪吾家寶爾
魯懷琳一帖之足以繫其中乎予故為之記以告夫好
古者楊侯名廷筠浙杭仁和人以壬辰進士為安福令
倒挿荆在二十四都石城洞前大合抱高丈許綠陰四映
蓋數百年物

泣馬坳在二十五都宋忠烈吳希奭子官統兵欲出吉州

至坳馬泣報勤王臺堡子圍老營破遂自刎里人立廟祀之

勤王臺在二十八都宋吳希奭募勇士數千人據堡子圍立勤王臺會蜀桂師力勦復袁州萍鄉衡州醴陵以勲授湖南招討使後元兵十數萬圍困希奭合戰十五日死之家口三十人皆殉難臺側臺城基址猶存

國朝孔興源賦云當吳峰之立馬正淞水之投鞭五國雲寒不返徽宗鑿輅兩堤月冷難邀賈相樓船鼙鼓震荆揚之野狼烽冲牛斗之躔文武則荻舟西渡宗藩則鐵籠南還青桐綠竹之鄉王畿莫保繡鎧珠袍之隊赤幟誰擎乃有瀘麓忠臣延陵公子諳戰法於丹弧受堦

書於綠水一聞飛燕動辰傾岳圯之憂絕似公孫竟劍拔弩張而起纏來絳幘自號老兵散盡黃金偏招勇士同盟百尺之臺遑問四郊多壘豈袁本初之子弟俱願從軍抑郭翁伯之賓朋皆能效死爾其雷鞞電晔劒淬成花雲馬風車弓開似月遂策名於天府約連蜀桂之師因奮志於沙場鼓銳湘江之卒揮干鏌而神摧望旌旗而色勃何來羽轄盡識淮陰突出雕鞍即降回紇傳箭岫嶺峰畔撤遂則吹散八千捍戈香水渡邊飛牋則威聞百越克奠河山終全城闕蓋力支大厦總劉琨之竒節可風而手障狂瀾實陶侃之精忠不沒也若夫猿臂勲成宣之鏡吹鷗兒凱奏封以蠟丸勅將帥於虎符

屹爾汾陽旄鉞圖功臣於麟閣儼然褒鄂衣冠一麾出
鎮百里登壇作吳楚三軍之氣幸東南半壁之完甫期
白馬千重閒散金陵之塹何意黃金十萬復臨惶恐之
灘於斯時也紅知薪火焰焚百雉之金城白是刃鋒冷
逼千巖之雪瀑孤軍則四面受圍八陣則萬弩俱伏欲
灑江東之淚忽吼烏騅猶懷海北之槎長鳴青犢爭死
戰者十五日直迴三舍殘暉聞呼起者數百人不駭八
公落木既共堅其一往之英風曾何有於羣姦之擇肉
未幾奮手折衝力窮摧衄百體已捐全家自戮騰臺畔
之荒煙動寰中之野哭是知王業多艱何千鈞之足繫
臣躬盡瘁尚一柱之孤撐望義旂兮不返顧良馬兮空

鳴荒壕遼濶兮雪霜冷舊榭崩頽兮星斗橫奏金笳兮
蕭瑟歌勒勅兮崢嶸百戰之疆場宛在千秋之陵寢已
更摩斷碣與殘碑兮祇憑弔乎武侯之古廟奠蕉黃與
荔碧兮又奚暇問滕公之佳城 李其昌歌云鳳凰宮
井變瓦礫六峰齊舉馳羽檄阿誰曳落膽氣豪延陵公
子抒竒績突舉義旗衆所推奮臂一呼轟晴雷不惜黃
金募義勇焚香共誓勤王臺勤王臺上寶劍寒勤王臺
下玉壘完願請長纓縛南粵願乘飛騎斬樓蘭飛騎雲
屯被組甲組甲上有金環壓星戈耀日關戟良整肅軍
容約軍法取筮敗麥法不弛挾纊投醪恩可恃撼山難
撼壯士心披肝共許從君死從君死兮卧綠沉秋風刀

斗夜蕭森東望江湘孤城失西連蜀桂萬騎臨寶刀刺
山山飛瀑筒箭射石石飲鏃一戰再戰萬戶擒萬戶擒
後如破竹擊鼓直奪岷崙關功成剖竹青油幕一麾載
出鎮楚湘諸酋應拜汾陽郭如何重敵十萬兵勁鋒銳
今百當一兩軍雄合三百圍寸鐵披堅十五日仰天中
矢神不變拊膺受創血徒濺一門殉節死兵戈留得高
臺枕青甸臺乎臺乎有時盡乾坤正氣終不泯俎豆中
村薦白蘋千秋憑弔生悲愍 孔衍戔詩云故壘森森
樹色寒誓師曾此泣登壇麾戈但得迴隆照啣石寧知
有巨瀾雲裏鼎湖冠履遠夢中鄉國雨風殘只今臺畔
延陵劍留取霜華萬古看

泰和縣古蹟

西昌故城在縣西三里漢為廬陵後改西昌隋開皇十年
廢西昌置安豐尋改太和移今縣治舊址廢為民居

廬陵故城在縣西北三十里漢興平元年置晉太康中移
於石陽故城即今縣西石陽坳

府山城在縣南四十里陳置隋廢

白口城在縣南五里梁大寶元年陳霸先自嶺南引兵討
侯景進頓南康高州刺史李遷仕來拒霸先遣杜僧明
築城白口禦之即今高城遷仕於其東築城相對即今

古城

互見
關隘

按舊志古城有二一詳白口城一在第三都宋季兵

興曾氏築土為壘保障一鄉後人名其處曰古城市
陶皮石室在泰和縣武山北又名北巘天將雨巘竇出泉
禱者嘗以此為候

明劉崧詩云北巘極嶮嶮三面還絕壁聞有山雨來石
泉先暗滴 蕭執詩云霖雨回焦土神遊隔翠輦至今
崖石底空洞自然春

鐘步在二都三教院有銅鐘唐永嘉二年鑄一夕失去得
之河中故名又龍塘寨亦在二都龍塘側有白龍塚

春浮園在柳溪明蕭士瑋建自為記 國朝施閏章有遊

記

蕭記畧云予世家柳溪楊文貞貽先宗伯有溪影入簾

春雨足之句園去柳溪二百武背市負郭便耕釣之樂
而無鳴吠之警左帶平原水木幽茂蟬鳴鳥呼頗類山
谷折而北為公安亭亭古壇地也稍前則金粟堂老幹
叢生其中其東有廊臨芙蓉池從此走嬋娟逕逕瀆湖
修竹數畝便娟可愛因取孟東野竹嬋娟以名之逕窮
有洲如月望遠樹如薺上則杯山矣山半峙湖中從湖
視山如杯從山視湖還如螺泛泛於盆中也陟其巔魚
遊樹杪人行鏡中樹影俱從中流而見走山麓則聽鶯
亭也亭北有橋橋可百武目力所際波遙似岼岼外固
湖也橋最宜月秋澄輪滿迫以驚湍勢不能圓泠泠有
聲其被於地人以為霜也從林而落風斯瀾矣竟無月

馬者久之得山馬曳如練光漸移過樹乃知是月也橋
之南古柏林立皆宋元物自此數百武叢篁夾路時避
時就輒與人易其藏一邱於曲折之中者宿雲墩也去
墩數十武植緋桃百株稍前則走愚山道也疊嶂夾天
角立競出長江一線時見樹杪飄影千章半落酒杯碧
知湖外草色如煙白在山腰雲容似帶谷出其足與水
爭地水齧其趾撥爾如怒挾以罡風勢恒欲墮旁攀一
山往來水上朝似東行暮欲西徙衝寒梅放香聞十里
者浮山也山空無人花自開落參差遠樹微露綺疏是
為秋聲閣矣閣旁種玉蘭西府海棠之類山南數百武
列植木樨坐久成勞拾級而登一樹一臺前帶平湖後

枕古樹臺南古樹百章孫枝旁柯日月至此輒相應避
光如雨點自枝間墮微風鱗鱗時碧時白如千尺霧縠
布地上過此即還公安亭道也余園居多暇涉筆識此
施記畧云泰和蕭伯玉太常自記其春浮園為時所
稱美蓋因其高下鑿溪壘山一亭一逕皆竭能殫智求
異於人伯玉既下世而余分守湖西壬寅春行部至泰
和連雨浹旬一日亭午方霽遂至園所時孟昉客虔州
求所刻春浮園記不可得地近城郭又數苦兵去伯玉
未三十年樵牧者皆得而往矣然亭臺半圯邱壑猶存
斷壁寒崖轟然斗絕回岡曲渚忽又奔屬客至者皆不
辨其為園也孟昉又別構小圃蒼叢妍好園中人能具

蘭舫筍輿酌家釀薦園茗余徜徉其中遇嘉石竒樹則
解衣箕踞坐良久驅吏人遠去或呼園丁問花木種植
剝治接養灌溉之方纖細疏記窮日乃返不恨園無主
人也得詩凡五首逝者有知將酌酒酬伯玉焉

盧度隱居在縣南五十里三顧山宋元嘉中盧度隱此池
內魚馴可以名喚

讀書堂在縣廳西北宋天聖中知縣呂士元子溱讀書處
後人為建齊呂堂

橫江亭在縣南臨街舊名南亭因黃庭堅江橫決事廳之
句易今名宋馮迪德有詩失載

光華亭在縣治東南百步宋嘉定二年建龍洲書院

愛蓮亭在主簿解前明主簿鍾雲建邑人李穆有詩序

序畧云丹陽鍾侯雲判吾泰和之初年因解宇之南有
魚沼改為蓮池且作亭其上為退息所扁曰愛蓮亭將
有待也又明年癸丑夏蓮花盛放侯為之喜方圖會僚
友燕賞為樂適縣境水菑民侯拯濟甚急於是大尹石
埭侯公躬歷被水之處以振貸安養為務侯則率民之
有餘力者修築隄防蚤作夜息弗遑寧處越二旬有竒
縣以無事而蓮尚無恙侯益喜曰種蓮而待其成於三
年之久蓮果不負於我蓮開而待吾賞於一月之餘我
當不負於蓮乃置酒亭上取蓮葉刺其心與柄通屈如
象鼻注酒其中做古碧筒杯以次傳吸而又出藕於泥

別子於房以克邊實主勸賓酌懽如也酒半吳公執爵起而言曰吾與二三子異鄉而同處一樂也同處而協恭二樂也先憂後適而於心無媿久勞暫逸而於情甚快三樂也况蓮之作花有次第必以待吾賞若有契焉四樂也賞蓮亭而具此四樂則其樂有自庸可忽乎衆皆曰然吳公遂賦詩揭諸楣在席者皆和之邑士大夫得於見聞者又和之亭之名遂日以遠嗟乎人以德重亦以文傳召伯之在南國德固足以感人而非有甘棠之詠亦幾乎息矣今西昌人士之於侯亦如南國之人之於召公而又加以倡和諸作比美甘棠則侯之清操仁政將不由此而益顯於無窮哉

明劉鴻詩云清水池塘蓮正開曉風涼雨濕漼漼千機雲錦鋪寒練萬柄琅玕捧露杯魚鳥狎人忘去住水雲留客盡徘徊追遊恐費郎官俸只合商量載酒來

越公臺在馬纓岡南縣西十里相傳隋越公楊素所建故名一名月樣臺

滄浪臺在縣西北澗秀溪宋嘉泰初知縣趙汝暮修又創亭曰臨清

雙鶴樓即鐘樓樓成有鶴雙棲其上故名舊名江南第一

樓宋徐鉉記失載

挹清樓在山谷祠前

明尹直詩云高樓宏敞挹深清乘興閒登稱雨晴秋染

澄江天際碧霜酣紅樹日邊明飛鴻陣拂風煙迥歸棹
帆投野渡橫三顧三華青不改老懷猶念歲寒盟

快閣在慈恩寺普照院南前臨大江舊名慈氏閣宋縣令
沈遵更今名元豐中黃庭堅有詩紹興戊辰署縣馮迪
德重建元至大間修程文海記明改湖西道分司署成
化末分司始移宏治十年知縣沈時修

記云廬陵有閣最一郡之勝在泰和東南城上邑令太
常博士沈遵名曰快閣迨黃太史庭堅繼至賦詩其上
而閣之名聞天下蓋自豫章沂流五百餘里江盤峽束
牽挽鬱隘罷心怵目至是山平川舒躍然如龍蛇之伸
鷗鵬之息跂而顧快可知已邑為州官事繁遊覽廢閣

壞為廐為驛獄訟之庭豈復知有所謂快者哉至大四
年邦侯聖陰徒貳車楊學文議改作而侯以監察御史
召留俸五百緡屬寓公高安尹嚴用文成之已而郎侯
祐來議克合掄材徵工撤而新之為屋三重重十楹前
為閣後祀太史中為燕休之堂三年而畢登斯閣也天
高水寬陽開陰翕禾黍滿野舟行如飛仙地之勝若始
闢焉明年高安之孫莊來京師以圖請記且道侯之政
予雖未登茲閣竊為之一快告之曰州曰太和至治之
稱也閣曰快自得之謂也治欲其至而民欲其自得蓋
相須也民不自得求其治之至難已山川雖勝而暇登
覽乎哉於乎太和邑也而為州守尊而親乎下民下而

敬乎上上下下各安其業非自得之驗而至治之候乎如
此則是閣之勝最於一郡乎哉書以遺之俾刻之石延
祐元年九月朔

劉咸賦云歲在壬子秋九月朔劉子領客出遊遂登快
閣於時灑氣初澄炎威斯薄颯金飈以徐來澹夕陽之
將落山隱隱兮如屏水溶溶兮可濯客乃臨流滌盃呼
酒肆酌誦蘇仙之樂章詠太史之遺作顧瞻徘徊嬉笑
謹謔撫前輩之行蹤儼風流於如昨翩然如天馬之脫
鞿羈冷然如露蟬之蛻汙顧謂劉子曰今日之遊不
其樂乎劉子曰噫嘻宇宙間佳境無處無之然非有脫
畧凡近之相遺外塵俗之姿識龍氣之可寶睹夜光而

不疑其弗棄毀銷蝕抑塞而埋藏者幾希故夫王維之
輞川杜陵之浣溪羲獻父子之蘭亭岑參兄弟之漢陂
是皆開闢以來之所有豈鬼物者能為之蔽虧經諸公
之遊賞辱大手之品題遂使尋常陰翳之林木等閒映
帶之漣漪莫不出光景以精采化腐臭而神奇不然則
亦藪蛟龍穴狐狸又安能垂鴻名於百世而啟後人無
窮之思者哉想夫斯閣當宋室承平之年太史出宰之
際政通人和時豐物備私室絕非分之干公家無不了
之事時一登眺憑闌徙倚胸臆總元氣之冲融脾胃絕
纖毫之渣滓目送鴻征心逐波逝鷺渚宛其逶迤龍洲
蔚其迢遠遠結鷗盟近瞰魚戲玩代謝於萬變等古今

於一世蓋將芻狗物類遽際天地其鳳凰不可以矰繳麒麟不可以羈繫曾謂皎皎之名規規之利可以動公之情而介公之意耶吾嘗品其為人論其風致措之乎陶韋之間列之乎夷惠之次雖未足以知公然亦自謂彷彿其一二也自公去後三百餘年澄江分明之月落木遠大之天歸船長笛佳人朱絃一舉目其如故曾與時而俱遷夫何若往若來風散雨聯獨無一人之豪傑可以與公頡頏而後先豈非易得者地難得者賢今吾與子適從容之暇日樂雅素於其間斗酒相屬酣嬉流連攄平生之魄磊掃沉疴而一痊細思其故夫豈偶然也哉嗟乎嘉會不常陳迹易朽想當時之傑屋與此閣

而並構豈不亦雄峙東西輝映左右然今求其故基蓋已十亡八九偉斯閣之猶新獨崢嶸乎其後豈非賴公庇休故能與世而永久然則吾當與子浮太白之巨杯泛周郎之醇酎上以酬太史之靈下以為斯閣之壽言未既客乃聳然而聽惕然而驚如夢如寤如醉如醒如廢而起行僉謂余能道公夢中之夢寫公形外之形蓋竊疑其非我以為太史之復生

宋黃庭堅詩云癡兒了却公家事快閣東西倚晚晴落木千山天遠大澄江一道月分明朱絃已為佳人絕青眼聊因美酒橫萬里歸船弄長笛此心吾與白鷗盟劉敏求詩云蘭臺應與閣齊名幾日陰濃雨乍晴雲水

光中天不夜塵埃境外月偏明屏開別岫三峰秀川映
危闌一練橫釣嶼筆床嘗有約定求煙艇不完盟 楊
萬里詩云太史留題快閣詩舊碑未必是真題六丁搜
出嚴家墨白日青天橫紫蛻 山寒江冷丹楓落爭渡
行人簇晚沙菰葉蘋花飛白鳥一張紅錦夕陽斜 雲
橫章貢雨翻盆寺下江深水到門落日荷鋤人著木西
風滿地葉歸根 文天祥詩云一笑登臨曉江流接太
虛自慚雲出岫爭訝雨隨車慷慨十圍柳周回千里魚
故園堤好在夜夢繞吾廬 書生曾擁碧油幢耻與羣
兒共樹降漢節幾回登快閣楚囚今度過澄江丹心不
改君臣義清泪難忘父母邦惟恐鄉人知我瘦下帷絕

粒坐蓬窻 元劉鶚詩云一登快閣情何極太史騎鯨
已上天煙樹冥濛秋可畫江山空濶客如仙半生不識
東南路浪跡深慚上下船四海故人相聚會忽驚歌舞
落樽前 明蕭岐詩云幾度乘閒登快閣摩挲老眼看
陰晴西昌詩派今誰在南極文星徹夜明往事已隨流
水去白雲長共遠山橫魚龍寂寞秋江冷吾道何人執
耳盟 王直詩云江山冥冥風浪生閣中清眺會儒英
野舟冒險只自渡汀鳥避人時一鳴四海登臨吾白髮
萬山迴合此孤城劇談轉切憂時念日暮浮雲况北征
李夢陽詩云四月月圓登快閣天半晚窻雷雨入邑
中上客攜酒至歐陽羅子咸來集去年為閣初築臺我

時登之雷雨來神明似有兩歲約晴霧歛值千山開千
山迴轉江中流徙倚闌干增暮愁夕日下看衡嶽破波
濤左顧匡廬浮苦思去年生盜賊大江南接江之北烽
火遙連海岱紅殺雲眼見鄱陽黑斯邑洶洶今始安我
今對酒能不寬諸君稍_減搬移共百姓新回種植懽北
風江湧月東來更說夙昔俱停杯陰晴倉卒不自料萬
事恍惚誰能猜潢池暫殄干戈釁向隅猶抱瘡痍哀勸
君置此勿復道放歌且與雲徘徊 羅欽順詩云戶牖
憑虛次第開喜看春色上蒿萊香凝便坐遙山合風動
高旌過鳥猜詠物思深渾脫灑懷賢辛苦重徘徊寧知
父老瞻依切願倒雙江作壽杯 徐彥齊詩云千尺飛

薨近碧虛丹青零落百年餘龜龍已剝郎官字金石猶
存太史書湛湛波光含寶鑑遙遙山色展新圖登臨懷
古增吟望撫景題詩媿不如 夏寅詩云白壁奎章映
兩賢澄江明月故依然詩懷德祐成孤墳書到元豐已
大妍漢道正當全盛日楚氛都過戰名_多 詞源欲問西
江派長句新留快閣鐫 蕭士埈詩云 頭望遠易傷
神世態瀾翻乍雨晴徙倚寒山人獨立淒涼秋水月空
明二東杼軸誰能息一路豺狼尚爾橫搔首青天那可
問煙霞差喜不孤盟 國朝施閏章詩云江天十日半
陰晴將去還來繞檻行極浦帆檣移遠樹四山煙雨羃
孤城風塵驅使春垂暮愁疾登臨眼暫明欲向黃公祠

下拜荒堦蔓草不勝情 查慎行詩云西昌漢古邑地
勢實開拓鏡光十里平倒影見城郭浮圖南北峙雙秀
拱一閣緬彼白下宰風流宛如昨官清無俗情景勝擅
傑作冰絃絕已久人境兩寂寞除却謝元暉澄江何處
著

墨池閣在縣學黃庭堅有前日學書池之句即此

南山精舍在四都西平明初曾鶴齡肄業其中時薔薇盛
開望氣者云大魁之徵後果及第

宏仁閣在縣前舊城上明宣德間建

狀元舊署即縣尉署明宣德癸丑曹鼎由典史登第故名
遠明樓近快閣陳恂所居

月觀軒在澄江快閣東宋慶元中縣令卓洵建又有一碧
軒署縣馮迪德建

按遂興故縣地入萬安東昌廢縣大臯城地枝廬陵
俱不重載

吉水縣古蹟

石陽故城在縣東北二十里漢和帝時立隋開皇間改為
廬陵縣唐開耀間廢舊傳有碑龜趺在岍碑沉水底水
落猶見大業等字

按續通典載故吉州碑在石陽故城歲久沉於江事
與此合今按石陽當在泰和詳見建置門城池志中
吉陽故城在吉水縣東百二十里今隸永豐

寰宇記

馬家城在縣東北二十里宋高宗時馬番尚公主子彥光授吉州理官擇地石陽故城南築宅久圯

唐吉水鎮在縣南

隋李孝子亭在孝子墓前明洪武初知縣李恒甫修其墓及亭陳宗舜記宣德天順間知縣柯暹劉釗先後重修周叙記久圯宏治庚申王綸立詩碑 國朝乾隆二年葺亭覆之亭西向十四年春復構亭北向與墓相對今圯

陳記畧云李孝子墓在儒學西偏知州費震題其墓石曰隋李孝子之墓至山西李恒甫來尹茲邑復構亭於墓前立碑亭上吉水忠節名天下而李氏子獨以孝稱

夫能使是邦之人自隋至今稱為孝子無異辭又能使邦之賢大夫前後表章如出一轍必非偶然而得者李氏子大業中人性至孝幼喪母易其孝於父每出踰里輒返曰吾可暫離吾父乎父病十旬衣不解帶既沒未葬比鄰舍失火驟至伏棺慟哭而死去今千二百餘年載縣志猶有可徵墓在宮墻之側得聖人為之依歸有過其墓者莫不顧瞻咨嗟曰此孝子墓也徘徊不忍去異時嘗與拔萃毛恂列祠於歐陽文忠公楊忠襄公之次二公以忠毛李以孝墓前有李孝子亭前州尹曹侯訝其卑陋謀於葉教諭改而新之兵燬亭與廟學悉化烟埃一杯無恙蓋有相之道今山西李侯恒甫來尹

茲邑視政先孝既新廟學復構斯亭文學郭子冲謂曰
是役也有功綱常宜文其事於石不鄙屬筆於余余聞
身也者親之枝也傷其親是傷其本傷其本枝從而亡
李孝子以身殉棺豈非本既不保枝亦隨斃孝子豈復
顧恤其身以覬苟延於世哉李侯此舉崇教本也匪直
觀美也後之人有能心侯之心尚因而存之俾勿壞
周記云人子之於親當無往而不盡乎誠也生則養以
適其歡沒則塋祭以致其寧此其常也脫有不幸捐軀
殞命所不暇顧是皆出乎天理民彝之貞夫豈以偽為
哉吉水李孝子事載縣志其墓在學宮之旁墓之前有
亭廢興不一國朝洪武初知州李恒甫新之前進士陳

公宗舜為之記宣德間知州柯侯暹復新之歲久碑殘
缺亭亦就傾今武昌劉侯釗來知縣事既除治其墓修
其亭慨石刻不存乃謀諸同寅伐石而屬記於余惟吾
邑以忠孝名天下有宋時楊忠襄公邦乂以通判建康
被執死楊文節公萬里以權臣專國不食死與歐陽文
忠公俱列祠學宮夫孝百行之本而忠節由之以興者
也忠襄當城陷罵賊不屈卒斃白刃其愛國之誠與孝
子伏棺於烈焰愛親之誠何如哉蓋當是時知有君親
而不知有其身知綱常大義之不可泯而不知白刃烈
焰之為可畏非天性純懿而不負所學養之有素者能
之耶吾知二君子易地則皆然矣孝子名不顯於史傳

獨以墓故猶使人觀感興慕若此豈非人心之天亘宇宙而不昧者歟由是言之孝子以孝倡於前文忠忠襄文節以忠繼於後俾吾邑縉紳士夫至今家服詩書而人尚節義者豈無由然哉因記斯亭遂并及之以為臣子勸

老人亭在同水鄉桃林宋景定間為百八歲老人羅敬子立元季燬於兵明永樂乙酉秋孫養蒙葺正德初羅璞復修金幼孜有詩序失載

白華亭在儒學右李孝子墓側為毛拔萃孝行立元季兵廢遂為射圃 國朝乾隆十四年春構亭南向與李孝子亭對

溪隱亭在桃林明永樂初處士上官止定建金幼孜記載失瑞賢亭在文昌鄉瀧江口石壁上其鄉有登科者石輒吐光因名明成化中知府黃景隆修吳寬記

記云世所謂瑞者或昭於天或發於地往往有奇驗於人載於傳記其事甚異然特一見而已至於屢見而屢驗人爭信之不以為異而以為常則其事益不可致詰矣宋韓魏公登進士第唱名至太史奏五色雲見人以為公瑞吾嘗疑其事之適然惟魏公其人足以當之故其事傳耳然亦所謂一見而已者吉邑有水曰瀟瀧自永豐歐鄉以下諸水皆合於此束以兩山奔流噴激亂石間聲如迅雷其下有淵深不可測靈物潛焉其崖有

吉安府志 卷九
巨石二屹起數丈俯瞰深碧狀若人負而立者父老以
為每夏秋之交石有采色爛然如虹如霞照映水面則
鄉士必有掇高科者郡志載之蓋其驗久矣宋天聖間
獨不驗衆方疑怪既而歐陽文忠公流寓隨州連魁三
試則公固鄉士也歷元至皇朝屢見之正統壬戌若劉
文介公儼天順甲申若彭侍講教並以狀元及第此其
尤驗者也其異如此初石名不雅或易以瑞賢仍作亭
其旁名瑞賢亭而里人王全璧者實董其役又攷自宋
以來百里之內由科第而出者得若干人悉刻其名氏
以著其驗事畢亦久矣於是彭公既沒其兄之子杰桓
同登甲科皆驗於此他日來道其從父疇昔之意求記

於予予為公門下士恐辱公命久未敢復也蓋石之為
物天下多有之而世之掇高科者亦多於天下其瑞不
驗於彼而獨驗於此其亦有說乎抑科第未足以當其
瑞乎試以歐陽公言之氣節振乎頽風文章變乎陋習
天下後世仰其人品以為不可及其瑞果繫於科第乎
若彭劉二公先後特起平生氣節文章亦欲希乎文忠
者其瑞又繫於科第乎蓋其事甚異非賢者不足以當
之彼以科第云者亦淺之乎知石矣易以今名於是為
稱

明鄒元標詩云秀色東南此一天嵯峨怪石糾相連地
偏倍覺風塵遠谷靜遲看日月懸昨夜嚴霜留虎跡今

朝潭底湧蛟涎振衣亭畔還誰語廿載風流憶昔賢
川上橋亭在儒學右畔明宣德間署縣柯暹建
玩龍亭在縣南張華山下有石洞洞有清泉為龍穴張國
寶立亭洞口

金魚洲亭在文江門外明宏治間知縣甯杲建

清泉亭在折桂鄉河畔明宏治間知縣顧景昌建

掛川亭在城南石礮瀑泉上宋淳熙十二年建

御書閣在螺陂宋御史蕭服建宋徽宗賜額

飛鳧閣宋知縣余端蒙建在縣治門上

宋楊萬里詩云塵外塵中儘靜喧閣前閣後且山川秋
生踈雨微雲處月仄青原白鷺邊眼冷庾樓聊復此人

如葉令更差賢從公欲往其如懶著句無佳莫浪傳

圓通閣在縣南渡口明永樂十七年建上曰圓通下曰濟
渡

觀音閣舊在北門外國朝康熙初修雍正五年改建層
樓高十數丈易名鐘樓李振裕記

記云余生長京師隨先大人間關南北跨齊魯涉江淮
泛錢湖之潮攬金陵鐵甕之勝幾不自知其為吉產也
每於趨庭問寢之暇詢及故鄉山川人物與夫都會井
閭諸形勝先大人指畫口授歷歷在目且命余曰吾鄉
山水竒秀甲天下多臨觀之美其嵩萃而具千巘萬壑
之勝者東山也其巍然特峙而為北門之鎖鑰者觀音

閣也余心誌焉嘗欲往而縱觀其盛莫之遂生十一年
大人解組歸取道甓社愛其風土而家焉又不得至故
里而觀所謂東山觀音閣者年十六移家返南昌私喜
幸自語今乃獲寄目以售所願矣逾年隨先大人來歸
行抵峽江縣地益高山益峻遙見蒼翠倚天扶輿蜿蜒
磅礴杳靄出於衆山之巔者不問而知為東山也因顧
而樂之私計登傑閣俯江流求先賢之勝蹟必盡歷諸
竒勝乃已行五十里至邑之北門維舟延佇見井里蕭
然野草迷漫虎豹爭處城內外居人寥寥如不足自存
者又何其異余所聞也閱十年太守郭公以事蒞吾邑
與先大人升高望遠慨然曰邑之圯而久不復振也得

毋地脉形勢有當補救而修舉者乎先大人歷溯今昔
盛衰之由謂公有志修復請自斯閣始郭公毅然力任
約先大人偕邑之縉紳士庶共謀之即日輦糞壤燔櫛
翳因其故址而程工焉會山水夜漲浮木蔽江皆集於
北門沙渚不去旦日聚觀數百人咸嘖嘖稱異事嗚呼
斯閣之廢久矣乃有待而興也若有山川靈物陰來相
之經度不數月而高甍隆棟巍然舊觀仍其舊名曰觀
音閣又四年僧智焰手一冊謁予堊室視之乃先大人
題疏也泣然久之乃力言於邑侯王公公遂捐金為之
倡而邑之紳士氓庶從而樂助吾知歡欣鼓舞而趣成
其事者衆也郡大夫倡之於先邑明府踵之於後而兩

公之德在民間上下相濟使邑之人無愁怨悲苦之聲
又蜀荒得請與民休息之始將見四民各復業而寧居
井廬廛市與傑閣琳宮掩映迴環烟火相接夫然後山
川風物鬱鬱蔥蔥以復吾鄉禮樂文章之盛予不敏又
當載筆勒貞珉以垂於後

凌雲樓在谷村宋李如圭建於居第懸御賜珠簾於上以
彰君貺

翠屏樓對讀書樓在仁壽鄉金塘宋朱淑寶建文天祥有

詩失載

文江樓在北門上樓側有飛霞亭舊名落霞宋知縣楊獬
改為飛雲謝諤書額元至元間改亭為樓劉辰翁書額

明宣德間署縣柯暹復建東攬秀軒西觀瀾亭尋燬天

啓崇禎間知縣何應奎陸運昌 國朝鄭作霖先後修

凝翠樓在山原宋文天祥題明楊士奇記失載

吳峰樓在縣治譙樓前與吳峰對

鎮波樓在三灘渡口明李陳玉修

生春翰墨之隙齋在城東里許宋解谷即所居東高阜建

臺文天祥書六字揭其齋兵廢明永樂間解縉復書并

記失載

南麓齋在湓塘南山下宋末楊叔芳建明解縉記

記云季琛楊先生令子民服述其先南麓齋之所以作
而請記於余曰先待制忠襄公所居里曰楊家莊由莊

之西行四五里南山秀出曰鹿峰俗傳有老父乘白鹿於此仙去故名或曰以其形似也故又曰鹿角峰其前行為平疇兩山對峙圓如覆釜曰金魚峰皆可愛賞山下有澗深倍尋丈北溪之水自旛竿嶺東南注之疊石為巘其流直下望之如瀑布噴珠擁雪聽之若鳴雷若震鼓若驟雨至聲遠益清若鳴珮環若琴筑然先高祖學睡翁少傳劉靜春之學通詩書易春秋天文歷數靡不研究精密著五經辨疑歷法五行論等書行世在宋大學與諸生上書斥賈似道之姦已而歎曰水火怒文明將食此天時人事將代易時也蓋歸乎哉中齋鄧光薦信國文公皆為詩贈之故曰學睡者寓迹陳圖南之

意時皆稱學睡先生始築室茲山之麓而題其扁曰南麓齋四方學者爭造其門以經學授清江范德機是為太史文白先生以歷法授習吉翁而習歷至今用之以天文數學授臨川鍾朗而南麓之學遂行天下至先曾祖文川翁又結交虞文靖公揭文安公歐陽文公申齋桂隱二劉公卒業於范公之門范公嘗贈之詩有曰始我南山居與子共朝夕服事子尊君恩義藹夙昔而文安公稱之曰范公之詩清江傳若金得其神廬陵楊伯允得其骨天下以為確論而文川不自以為至也退居南麓弟子彌進若渝川黎應物廬陵劉粹中里族楊樵謙皆知名當世元末之亂齋燬於兵亂後先從祖濟川

復闢館於茲以授學者洪武中家君始為堂宇繚以周垣高明宏壯有加於前聚書數千卷俾黼與弟誦習其中而求得前中書舍人詹公孟舉大書南麓齋三字揭之朝夕思維繼紹前烈未幾而家君出仕為令海隅調官山東貽書丁寧兄弟凜然孤陋無與講明者昔先生嘗辱顧之願一言以自勵余三復其辭而歎焉余惟始遊南麓時民服尚少然已竒之不謂其能文如是也且自學睡翁至今百有餘年國家代遷陵谷俱變而南麓一齋絃誦之聲相續不絕是豈可以尋常盛衰視之哉百餘年間經濟道統之學所以維持人心世道者皆出於是也今之世濟其美者豈非天之意歟

振古堂在縣北六十里南山中宋王子俊建

按揚子直有文豹識顯藏終朝霧如沐之句朱子讀而善之比之輞川漆園

東山堂在縣南龍華山

看水軒在仁壽鄉元處士姜達建

誠齋故宅在縣西北五十里朝元嶺下宋楊萬里自秘書監將漕江東退休南溪上周必大罷相歸訪南溪賦詩或繪圖以進

宋光宗賜詩云黃蘆洲上雪初乾風撼枯枝晚更寒靜艤小舟誰得似生涯瀟灑一漁竿周必大詩云楊監全勝賀一家賜湖豈比賜書華回環自闢三三徑頃刻

常開七七花門外有田聊伏臘望中無處不煙霞却慙
下客非摩詰無畫無詩只謾誇 徐璣詩云名高身又
貴自住小村深清得門如水黃惟帶有金養生非藥餌
常語是規箴四海為儒者相逢問信音

東園在東山下宋楊萬里關內有三三徑萬花川谷小齋
狀似舟名曰釣雪舟又有雲卧菴誠齋石刻誠齋二字
宋光宗書賜

楊雪後東園午望詩云天色輕陰小齋中晝眠初醒未
惺鬆梅橫破屋無多雪雲放東山第一峰不道風光虧
此老將何功業答殘冬土羔菜甲鵝兒酒醉入梅林化
作蜂 又雨霽看東園桃李詩云藥裏關心正腹煩強

排孤悶到東園行穿六六三三徑來往紅紅白白間繞
樹仰看渾弗見隔溪回望不勝繁村村桃李家家有脚
力酸時坐看山 又新晴東園晚步詩云一日秋陰一
日晴山禽相賀太丁寧不愁白髮千莖雪隨喜黃庭一
卷經晚霧薄情憎遠嶺夕陽作意戀危亭孤吟莫道無
人覺松竹喧傳菊細聽 忙裏清流也帶塵關中底物
不長新水將樹影揮空帶楓換秋容作好春自是不歸
歸便得老來下筆筆如神鶯花剪燭無虛日賤相誠齋
一老人 周必大詩云萬花川谷第芳菲也許湘靈媵
伏妃翠葉迎風牽荇帶紅綃浴日濕宮衣共船不妬龍
陽釣警乘猶疑洛渚飛誰把荒園一魚目換將五十六

珠歸

長林書屋在廬陵吉水間明胡廣故居前有金螺白鷺之勝後有青原石礮之奇芙蓉天嶽諸峰截然相望於左

右實江南勝處

楊士奇序畧

雙嵯草屋在仁壽鄉月岡明周忱建東有仙師山之勝山

陽有二嵯東嵯下石洞中可坐數十人世傳有仙人乘

黃牛故名黃牛洞西嵯下為壇二嵯皆僻立十餘丈

嵯麓有竹數千松萬餘株東西二泉出山陰流為小溪

傍嵯而東南踰一里始滙為一西折以入於江

忱自序畧

崆峒山莊在崆峒山下明羅洪先建

石蓮洞在同水鄉明羅洪先闢下如覆盂有堂有與石壁

黝曠人物花鳥諸狀天然不假繪斲中為佛廬右嵌空

翠嶼豁訝透漏別有小洞天二上有梅關額仄徑短垣

署曰虎豹關洪先自書洞南堂有正學六秀閣有觀復

懷濂及遠塵樓探月軒歸靜處諸勝左為講堂洞門右

有羅漢松大十數圍洞上有古荆樹高數丈餘竒立石

間奇石森列梅關前有高丈許者尤聳拔可愛

題味見山川志

黃金臺在縣西北五十里朝元嶺

龍戲碑在龍華寺西階明宏治十四年修一日風雨大作

龍蟠石上碑石遂長文字平滿作水波浪漫滅不可讀

寺記

使君巖在洞崑山山在中鵠鄉東晉郭璞嘗至其地漢張

道陵第為三百六十洞天宋開寶四年徐鍇撰碑記唐
貞元中閻寀守廬陵表請入道居巖中故名解縉有記
載失

霜崖洞天在文昌鄉西山麓洞有石船宋陳橫齊張習甫
張養直始標識之

明羅倫詩云野人踈散便成仙自在吾心自在天紅葉
為誰流水去白雲留我碧山前煙傳桑海三生石月抱
袈裟九月船風物不殊諸老異露花無語對潺湲

儒家蓬山在文昌鄉虎溪蕭氏別業陳村民記

記畧云蕭有肅賓之所曰儒家蓬山有倚天樓花柳堤
皆宋穆陵宸翰又有漱芳堂丞相萬里江公書秋野堂

趙子昂書

飛來石在折桂鄉明覺寺前石磊三疊皆嵌空舊稱神人
所移王雅有磊石如山掛薜蘿傳聞神力夜飛過之句
元潭在仁壽鄉贛江東有崇元觀相傳呂洞賓有詩又觀
中傳晉時許遜將治蛟冶劍存觀中元時興國道人七
過廬陵竊之吳真人遣還本觀明成化間為中官取去
觀後有石丈許中分為二名試劍石傍有閣巋然名雪
浪閣在潭北明羅洪先講學處

呂詩云褰裳懶步尋真宿清景一宵吟不足月在碧潭
風在松何必洞天三十六 宋楊萬里詩云贛江東下
千里許流至閣前虎須怒旌陽橫劍居上頭喝命長江

教倒流跳作旋花雪山立濺得琳房滿間濕秋來水落
 未足看桃花浪暖君來觀一波打窻心膽寒 文天祥
 詩云棄官學道勾山許學到至人本無怒赤子臍臍如
 魚頭不堪妖孽腥上流鉗鍵長潭鐵樹立摩挲穹石寶
 劍濕當時豈忍如是觀毒流不可開眼看英風凜凜萬
 古寒 揭傒斯詩序云元潭觀舊藏許旌陽斬蛟劍興
 國有一道士七過廬陵竊之至於京師以獻吳真人邀
 予賦詩遣還本觀詩云章江渡頭白羽扇千載傳聞誰
 得見惟有元潭老劍精萬里相尋若驚電冥冥旌陽九
 雷駕神物無歸思變化當時同學十二人猶有吳公在
 天下吳公曉出勢割山石愁氣挾草木寒安得天風吹

繫彼日月還麻姑綠雲髮黝黝長不殘

養龜池相傳縣治形如五龜聚處故有五池養之歲久湮
 塞失其所或言在縣治東西南三方 國朝康熙十年
 縣令王雅夢獲其一命工迹而浚之甃石猶存

匡山瑞木在仁壽鄉三都宋政和中孝子李籌兄弟廬母
 墓側產木一本兩幹高丈餘復合為一至其末仍分兩
 幹五枝人以為瑞王庭珪記載失

羅漢松在忠節祠前宋楊萬里手植

明羅洪先詩云移根自祗苑遺愛為誠齋曾借琴書潤
 猶當俎豆階地靈人自美風古色逾佳剪伐寧須戒伊
 人衆所懷

桃花院在縣東五里鳳山下瞰文江
環溪樓在縣北嶺口江州學正楊用能建程文海詩云白
雲滿地種蒼木青草湖邊開白蓮

卷九終

吉安府志卷十

山川志

古蹟

坵墓

永豐縣古蹟

曲江畫像唐丞相張九齡元孫張景重為袁州司戶參軍
第五子宏深居永豐藏曲江真像吳道子筆後為巡撫
張岳取去今其家尚存摹本

按錄內有中書省印又有阜陵御讚曰鹿入深宮花
解愁牛登高鼎餗停休當時若聽履霜語豈到我眉
山盡頭噫雖嘗因奏薦而問公風度蒙大難而遣使
祭饑不識噬臍禮意曲江何以荊州淳熙十三年二
月巳酉題

放生池宋紹興十五年詔所司訪求乾道遺跡置放生池
時永豐縣前截溪為池立柱揭榜禁魚網罟後縣令吳
南老改立縣東南隅濬闢開廣上建恩波亭每歲天中
令節率官吏至亭取飛鳥潛魚縱之董德元記失載
張欽寨唐末時張欽討彭玕屯兵於此玕有一謀士劉守
真能呼風喚雨欽與戰輒不利堪輿家皆言玕先壠在
雲裏峽有王氣欽陰遣副將發其壠見棺上有小赤蛇
旁有蟻運土如弓劍形盡毀滅之及歸與戰遂勝玕敗
走

按張欽彭玕事府屬各志互見永豐志詳掘墳之說
不知何據劉守真通志列方伎傳風水之說自尋以
來相沿即此可見

聖嶺宋理宗時占者謂有天子氣遣臨江總軍萬戶程層
益領兵移屯防守於此今其地稱營前營下營腦軍田
即其屯田也後有楊葉二僊從聖嶺飛昇乃罷兵屯守
層益徽州歙縣人子宣襲蔭遂卜居永豐城隍廟前旋
鬻於官移居水南永寧洲

按識謂水打程家園永豐出狀元益水繞羣英閣後
抱學宮右曾羅二狀元及第時水勢果合識語即程
宣故址

瀧江阡碑宋制兩府例有墳院歐陽修既參大政素惡釋
氏久而不請韓琦代為之言乃請得瀧岡道觀又以崇

公名奏改西陽宮守青州時自為瀧岡阡表刻石以歸
舟泊廬山夜夢神人借碑入水明日風浪大作舟欲裂
修悟夢中語投碑於湖黃庭堅作檄龍文沙溪墳前適
見靈龜負碑出上有龍爪點痕跡取置西陽宮覆以亭
後宮被火獨碑亭無恙

按此事本涉於誕辨見邱墓志中因傳譌已久故仍
附見古蹟而削檄文不錄

嚴城在縣南十五里舊傳唐末有嚴將軍聚兵於此
徐侍郎宅在縣西唐中書侍郎徐安貞宅後為報恩寺
山光樓宋時石井張武仲子師良建楊萬里用韋應物烏
啼山光夕句顏曰山光井記

揚記云永豐石井張氏秀民相望磊磊也昔乾道間文
仲武仲弟兄好義喜賓客治樓觀築園囿與往來士大
夫行樂其中文仲之樓命曰霽月武仲之樓命曰憑虛
皆求名於予而予命之也今垂四十年矣客有自石井
來者予必問二樓無恙否為我寄聲樓中風月客曰霽
月故無恙憑虛今為烏有先生矣予每嘆息歲月無幾
何而泐之廢興乃爾其速也客曰憑虛雖廢而武仲有
賢子師良字希房者積學擷詞尤工詩句即其舊址作
新一樓糜火音宇靡遁今覽宇前有嶼嶼上有葩嶼外
有泚泚中有渠泚外有疇疇若博局疇外有溪橫若羅
帶是皆未足為樓中之偉觀也因出袖間一圖予披而

視之則佳葩美木繁蕪爭發秀色奪目竒芬襲人予為
驚喜客曰未也客以右手卷其軸而左手舒其繪樓隱
隱浸沒而葩草亦翻翻退藏忽有萬峰橫空起立邇者
如黛遐者如黝濃者如濕淡者如無銳者如筍卓者如
屏跳青躍碧呀雲喻露或嚮而來或背而去或偃而倨
或僂而揖或奔而追或凝而居予不覺眸子眩晃應接
不暇客曰某之來也希房九頓首奏記願徼福於先君
武仲敢請先生名此樓且記其役予曰韋蘓州之詩不
云乎鳥啼山光夕此古今絕唱也命以山光可乎客謝
曰幸甚

相石亭在明德鄉宋丞相文天祥募兵勤王空坑兵敗

趨劔南追兵至此幾及之忽巨石墜塞途次追騎驚伏
得脫去後人以為神所相也因名相石一曰神石作亭
覆之石傍有屯軍坵斷事廳馬伏坡皆丞相遺蹟
醴泉神像在藤田市宋劉元禮上書討賊有功詔授八門
侍讀其嗣孫劉禹錫為江州觀察推官歸鄉祖孫皆能
賙卹鄰里先是元禮曾將湖西湧泉寺遷於藤田市改
名醴泉建炎間裝塑佛像鄉民遂將元禮禹錫肖為二
神像以報

歐鄉起自南唐進士歐陽儀表坊里

按儀即修伯祖未居沙溪墓亦在廬陵桐木官山其
稱歐鄉似不始此姑仍之

安福縣古蹟

安城縣故城去縣六十里即漢安城侯張普所築安成亦作安城

通志亦然後倣此

平都故城在縣東南百里王水口樟樹沒於龍陂即其水

也漢時平都縣在此以地險徙之舊城猶存本寰宇記輿地志

安成郡故城晉元康元年朱居為安成太守築郡城郭內

有雙闕高數丈隋平陳廢郡為縣寰宇記

廢安福縣在今縣東六十七里枕王江之口

新茨亭豫章太守賈萌與安成侯張普戰於新茨之野今

安福縣側有新茨亭

龍陂王江東流與瀘水合其滙為龍陂去安福縣東南百

餘里顧野王謂是掣材之處土人言孫皓時伐木順流

至此陂而沉以繩挽之即有風雷之變後歲旱試相牽

拽之風雨立至宋元嘉中木忽自浮水面厚可五寸其

半猶沉水中垂成沙洲名勝志

魏夫人煉丹池在儒學前一名放生池相傳煉丹處至今

無蛙聲

殷仲堪讀書臺在郡西大池之上築臺讀書今遺址尚存

安城記

明王德新詩云五馬承流多暇日青燈還有讀書期香

芹辟蠹遺殘簡春雨生苔瘞古碑捲箔不妨山入座橫

琴長待月臨池安成千載遺風厚只說殷侯郡治時

陶淵明讀書臺在縣南書岡山

明謝利貞詩云昔人讀書有臺名至今此地猶書聲門
前碧玉環秋水松上笙竽雜早鶯鶯聲乍起書聲歇曳
履橋門看春色春色從來不可留還向溪中弄溪月
夏振詩云白雲繞屋樹蒼蒼曲几無塵竹素香俗客不
來清晝永高風猶似晉柴桑 彭華詩云春山鬱鬱樹
蒼蒼茆屋幽深石徑荒疑是淵明今尚在白雲繚繞讀
書岡

姚崇讀書臺在縣南洞虛觀後

龍雲讀書臺在縣西下村宋劉弇讀書處

白玉蟾遺刻在武功山箕峰菴

國朝張貞生武功筆記畧云予遊武功山巘洞竒處不
獲周遊山僧復引從圖坪三天門白字堂蓋以堂有白
長庚墨蹟故名其詩云仙境閒尋採藥翁草堂留語數
宵同欲知山下雲深處直是人間路不通泉領藕花來
洞口月將松影過溪東求名心在閒難遂明日馬蹄塵
土中後自署其尾云三清選客玉皇舉人雲外子書予
讀而疑之蓋長庚既證仙位必無名心則無往不閒無
往不閒來洞口無異泉領藕花過溪東無異月將松影
豈若世人勞勞逐逐尚有車塵馬跡可言即世人登場
傀儡趨富貴利達如驚方且藉仙真烟霞水雲之言以
醒其顛倒夢寐道路奔馳之心以洗其壯懷熱腸寥落

不平之氣而長庚之詩乃所云名心難遂馬蹄塵土則
是浮雲一切之仙不能為世人解脫而且為世人作備
有是理乎然將謂此詩非長庚之作不可而謂其字即
長庚所書則誠不可不辨意者其詩為長庚所未證仙
時之作而後人或借其名而書之以傳疑然觀其字跡
亦非淺近可辨或亦如近日乩筆託之仙以傳耶吾獨
恐世人之皇皇有求者將藉口仙真而吾儒富貴不可
求之說將無以勝之則予今日之論非為長庚辨疑直
欲使世之人恍然有所求者之未可言儒亦未可言仙
浮墩在安福縣西七里今號四望墩下有昔人作石羊獅
子尚存

落亭與浮墩相近縣曹童翱得仙之所

趙居士故居在縣東南水石幽勝為唐趙居士故居

按居士名原陽安福人博通經史嘗夢神語曰汝神
仙中人何望富貴遂絕意人間事從遊塵外不知所
終

三仙臺在縣東南黃牛嶺上

元春閣在縣北門外一名文昌閣居鳳林橋下今閣廢遺
址尚存

宋黃庭堅詩云宮殿繞風烟江山壯城郭令君藝桃李
面春築飛閣春至最先知雨露徧花藥是日勸農桑水
銷土膏作絃歌出縣齋徘徊問民瘼雞犬聲相聞嬰此

簿領縛安得攜手嬉烹茶煨鴨脚

愛竹堂宋令李康成建

宋黃庭堅寄題詩云淵明喜種菊子猷喜種竹託物雖自殊心期俱不俗千載得李侯異世同風流為官恐是陶彭澤愛竹最如王子猷寒窗對酒聽雨雪夏簟烹茶卧風月山僧知令不凡材自掃竹根培老節人言愛竹有何好比中難為俗人道我於此物更不踈一官窘束何由到

朝華亭宋令李康成建

宋黃庭堅詩云丹楹刻桷上崢嶸表裏江山豁眼平曉日成霞張錦綺青林多露綴珠纓人如旋磨觀羣蟻田

似圍棋據一枰對案昏昏迷簿領暫來登覽見高明
適軒宋令李康成建

宋黃庭堅詩云琳宮接叢霄淥水連翠微幽花露林薄好鳥娛清輝道人勤洒掃令尹每忘歸孝慈民父母虎去蝗退飛來思僚友同歌舞醉紅衣定知與民樂吏瘦吾民肥

環翠閣宋劉元明建

宋楊萬里詩云閣在青圍翠繞中何時我輩略搢筇亦聞佳勝無多處只有千峰與萬峰

盧溪草堂宋邑人王庭珪乞祠歸隱築室於城南胡安國嘗過之與庭珪商畧春秋傳義數日乃去

輿地廣記

勉耘堂在縣北六十里宋邑人彭竒宗建文天祥說見藝

浩齋宋邑人劉彥與為其父建直建揚誠齋集

醉樂堂宋邑人歐陽似於東門之外闢三徑作一堂揭曰

醉樂揚萬里記載失

臨溪亭在縣南元李鼎翁建歐陽元有詩失

臨溪樓元延祐間張師亮建

元敖邁歌云花溪老子昔喜花紅雲紫霞香滿家竹溪

逸士昔愛竹翠靄蒼煙陰遶屋嗟茲偉人臨溪樓唐相

之裔來溪頭奄有花竹著樓所日與溪山作賓主手挾

銀漢地上流仰送飛鴻俯盟鷗滄浪濯纓塵化雪清泉

烹茶團碎月曾似元龍意氣豪湖海偃卧百尺高又似

仲宣銷憂賦客居江左非吾土不如祝翁畫欄前梯身

此樓近青山湔心此溪赴滄海樓名溪聲可千載

守貞堂明張敷賢建奉其母吳氏李東陽記

記云守貞堂者安福張敷賢氏所作也敷賢之先處士

淵冽娶於吳數年而疾疾且革屬敷賢於吳曰我病且

死乃不終殄於天幸今有孤焉我即死汝其無愛一日

之力以為我張氏保此孤也吳泣曰天矜君而予之孤

其將有成乎君之言實與孤俱存吾何敢死之惟終身

焉夙夜是圖君無患焉處士卒吳竭力治墓墓既躬績

織以食其孤及敷賢壯娶而生子吳猶未衰益二十有

二年於茲矣敷賢念母之德輒流涕曰某不幸不及父

事賴母而後行筑筑昵昵以至於有今日有婦與子以永宗祀幸先君之遺業未墜皆母之德天之報也乃作堂奉母而居名之曰守貞以識不忘既又曰吾能識母之德不能使暴於天下無以稱為子謀於其從兄鄉貢士公美公美上春官告其兄車駕郎中公實以請於予曰願有記予歎曰嗚呼人疾痛愁思必呼天其悃悞哀懇有不空偽者然此非足以動天也惟守以正則天必應之坤之六三曰貞曰有終婦代夫終正也喪夫之道非死則守觀吳孺人非不能死即死無所益乃能勤苦淬礪歷寒暑饑饉之變其難奚啻百死卒終先處士之志成其子之身若孺人之言則哀且誠矣其守則可謂

貞矣天之為報昭乎在此由是以迓祉延祚垂休於後之人寧有既乎若孺人者表之以為世則可也予與公實同舉進士入翰林甚厚其所居地與余茶陵比境其邇且親故知其家世甚詳公實之先御史公死於國事今又有貞母者出乎其族何其多賢也予又聞孺人實學士與儉先生從女禮儀之教固於是乎在因并記之以告後人

合婚橋有二石梁昔有娶妻者經此妻不從指橋誓曰石合乃可石果合因名

龍泉縣古蹟

龍泉舊城在縣水南距今縣治二十里舊龍泉場即今十

七都慈雲寺

金山塔宋元符二年邑人朱氏始建山巔宣和末縣丞方
詳撤塔別置尋廢淳熙元年邑令范德勤仍故址復建
元至大二年項振宗修至正十五年楚寇彭時中據龍
泉廢塔葺城明宏治間邑人捐復

銀山塔邑令范德勤建前有朝龍院淳祐七年改泰霄
觀景定二年邑令陳昇建龍頭坊元至元二十三年徙
水南復為院未幾院遷三都長木坑塔為寇燬明崇禎
間邑尚書郭維經同彭承憲等修復築堤接溪橋初維
經未第時邑人士梁愈榮等聯東山社課夜夢白鶴飛
至塔上次早占之則維經至文果冠曹 國朝康熙間

邑令趙嗣抃建菴曰顧橋乾隆二十四年邑人張振義
彭祖樑等糾邑人倚塔建抱景樓南為迴峰閣又南為
小橋覆以亭曰彩虹南河岍為亭曰鎖翠又自古朝龍
亭故址闢為堂塔西顧橋菴前豎木架屋曰津逮買田
善後攝縣張若翼邑人周堽記

張記略云距治城東里許有銀山者前鄉大夫郭公維
經偕邑紳彭承憲復修其塔且累土續堽俾勢衍而彌
長邑前侯趙公又建菴數椽於塔旁顏曰顧橋規畫固
殊焉總之不離乎括山川之奇秀收風景之麗都者近
是戊寅秋余捧檄來撫茲土明年春耕藉山麓禮成憇
其巔眺焉於山見諸峰之蒼烟歷亂於水見雙流之波

濤泐泐於塵市村墟浮橋泛筏以迨綠野平疇則又見
遠近參差櫛比而冪歷益嘆是山之營衛包羅無盡也
越數日邑紳張明府彭廣文諸君持一圖詣余而言曰
攷邑乘所載群英舊社及諸亭院統為是山設也兵燹
後舊址無存竊欲於山盡處創樓堦續處監亭亭斷處
貫以長虹虹度處復聯以亭余按而索之恍然於是圖
之可以行也爰叙顛末捐薄俸為鳩工庀材倡喜不數
旬而樓成亭與橋俱成矣括山川竒秀收風景都麗後
君子視今亦猶今視昔則並茲山不朽者寧浮圖梵刹
云爾哉 周記畧云出郭東數百武有阜蹲其衝曰銀
山宋賢尹何嗣昌徙治北時以此為山水鍵鑰至明鄉
先生郭雲機冢宰建浮圖其上迤阜而南昇土築堦若
象鼻斜卷至河之湄而橋之嗣是前明府趙公創菴於
阜名之曰顧橋今乾隆戊寅春鄉先達張省堂刺史彭
景亭學博兩君子皆掛冠歸林雅有溪山深致輒與邑
人士躡屐是山釀錢布以樓其上更緣堦而亭館其間
越明年落成余時至自中州與登斯樓追維已事恍然
見郭中丞之遺蹟增新也憶中丞在明南渡時抗章劾
阮大鍼之悖實錄污政府至於播離瑣尾與明祚相始
終而故里遺踪僅此銀山一壘諺所云擎天一柱庶幾
如見其人則諸君子之勤事於樓與後作者之未有既
也居可知矣

東園在縣治東園中建庾亭宋熙寧十年邑人郭知章與
邑令李沂宴賞於此知章有記今廢

記云縣治東迤邐數十步有隙地周之以墻廣袤可三
十丈號曰東園園之中植之以亭名曰庾亭棟柱宏峙
簷閣飛舞尤為卓犖雄偉雅致勝狀者故縈紆迴旋或
衝或激層疊突兀若拱若伏此亭之山水也曉氣清而
引輕碧暮空淡而浮彩光此亭之煙霞也風動而微涼
生涼生而溽暑遁此亭之清爽也衆籟遠而喧囂息百
慮汰而是非忘此亭之虛曠也托此而望者蕩然無際
亘十百里遠固可秋毫之察耳豈非身之所躋者愈高
則目之所到者甚遠宜乎懷自私之心足此而輕彼也

然易其所視彼或可以勝此如之何而足也余嘗因邑
宰李公與之遊外寓於目內得諸心固異衆之自私處
其靜則思有以制羣動履其高則思有以覆至卑也望
其廣且遠則思有以祛隘陋而蹈光明也對土木之巧
念工傭之費則思上之所資遊觀者皆出於民力尤
可愛也嗟夫後之人登斯亭皆足以自發則經畫而成
之者庶乎無愧矣

白羊城在縣西北二里古山寨也下臨深淵上有廬屋洞
建炎四年楚寇邱權犯境縣令趙迪之率衆拒守山寨
邱權遁去

柴節度使宅在縣西北二都五代周顯德中世祖族入柴

克貞仕南唐為袁州刺史遷德勝軍節度使後徙洪州節度使

肖顏堂在七廂南城宋邑人梁棟以直言為用事者所忌遂不復仕晚以肖顏名其堂周必大記

記云龍泉隱君子梁公克道以書來示曰吾老矣進無求於世退而築堂名曰肖顏非敢肖其德也以吾之貧庶幾有其陋巷云爾子盍為我記之予以童子從公鄉校荷蒙訓迪獎掖甚厚今不遠千里來索鄙文詎可以淺陋不能辭請誦曩時所聞緒餘而復公命嗟夫簞瓢自樂顏子之極摯也何以知其然哉蓋嘗讀魯論而得之夫子之稱顏也曰愚曰好學曰不違仁但許之以用

舍行藏告之以四代制作非不重且大未聞稱其賢也獨在陋巷則曰賢哉賢哉回也稱之不一其辭予是以知簞瓢自樂為顏子之學也若拳拳於善仰高而鑽堅瞻前而忽後惟恐一時而或失之惡在其為樂哉及夫聞適衛而得心齋之妙由心齋而進坐忘之域隨肢體黜聰明離形而去智殆不知陋巷之為華屋歟為陋巷歟簞瓢之為鼎食歟為簞瓢歟蓋非道之大德之成曷克臻此故曰簞瓢自樂顏子之極摯也不然則安居而不厭菲食以自適後世小廉曲謹之士皆能勉力而為之奚足為顏子道又奚足以動夫子賢哉之稱也哉今公自少至壯自壯至老其志則希顏子而其貧則過之

且能築堂揭名以從容其間可謂博學篤志不以老而
自衰者矣揚子云希顏亦顏徒是也公何遜焉雖然貧
在外也樂在內也在外矯飾皆可觀在內非聖人莫能
辨昔人有言座無尼父馬別顏回予小子何足以識之
哉但他時劾官歲滿歸省邱墓尚其登肖顏之堂尋肖
顏之樂公必有以語我是為記

舊枋木場在水南七廂南唐加李孟俊為採斫使此蓋斫
伐枋木之所也置縣後採斫之名雖廢而貢枋木尚仍
其舊歲輸本州造船以稅務監官領之宋治平中漕使
程師孟求新曾棗議令民納錢於官官自市木後造船
場徙於龍興遂罷監官場舊址久為民居場前有渡謂
之枋木渡今廢元至大二年稅務大使邑人項時大於
其地建橋亭名獅橋亭

盆珠在縣西一都相傳有龍戲珠峰頂故名宋承宣使岳
飛征彭友於此立營築點兵臺於馬軍墩有駐軍盆珠
詩及平寇紀績文勒石

記云古屬龍泉山寇彭友竊據縣城賊首陳顥等流毒
虔南地界紹興三年夏四月予奉詔命進勦先鋒張憲
王貴等間道永新抵泉駐軍縣之盆珠干戈四塞蔽野
予一戰擒友賊衆大敗逃遁固石洞依山為壘六月初
旬提兵由武陵疾馳賊巢斫死陳顥賊黨餘酋悉降俘
老弱二萬有奇選其精壯者盡編入伍徒軍尅平奏凱

居民遮道壺漿以迎王師惟皇赫濯丕振聲靈用伐山石紀厥功成

詩云雲屯壁壘夜鳴鉦帳擁珠岡翠色縈但使狐魁乞一活何須血刃下孤城日連旗影蠶洲暗光拂劔花遂水橫虔吉未平歸未得何時廓宇罷天兵 國朝知縣杜一鴻步韻詩云功成談笑古鉦鉦斷碣埋砂戰血縈半壁懸崖開虎帳千乘遊騎繞龍城祇看盆嶺珠光起猶識將軍劔氣橫一代英雄空小試可憐急罷渡河兵祭忠臺邑人成器為位哭劉球處廣輿記

按祭忠臺有二處一在浙西餘姚成器即其邑人未知孰是

儒林義塾在鄧林街元劉桂平建有吳澄記廢基尚存按通志龍泉縣古蹟未及採載一條豈修志時徵取縣志未到耶今觀盆珠為岳忠武勒石紀績處尤不可不著其他亦皆雅飭可紀特為備錄

萬安縣古蹟

魚梁城在縣南十里李遷仕據大舉遣其將軍杜平虜入贛石魚梁作城周文育擊之杜棄城走文育據其城即此通志本南史名勝志

舊志云在縣南五里臨大江黃公灘之上

遂興縣城在縣西北十五里後漢獻帝立吳大帝改曰新興晉武帝復為遂興以在遂水口為名隋平陳廢參通志本

地輿志

舊志云舊屬龍泉今隸萬安

互見龍泉縣古蹟

烏石爐場在黃塘界燒石成灰其質細白宋元時取飾宮殿後灰粗不逮前乃不上貢

稅務場在縣東宋元時立其址猶存

上宏務在十五都宋元時收軍民稅契置明洪武時廢

玉山館屬萬安館在朝天橋側隋唐間建立

見一統志

唐張籍題館詩云長溪新雨色如泥野水陰雲盡向西

楚客天南行漸遠山山樹裏鷓鴣啼

光華館舊名開元館在龍溪書院側宋縣丞賈涉來任生

子似道於此後易名光華

知津閣在縣西大江口舊名雲洲後取蘓軾此生何止畧

知津句故名

一統志本

五雲閣在贛水濱龍泉水出其左上有閣宋時建對水西

芙蓉山

宋戴復古詩云凌空傑閣為誰開隔岼芙蓉不用栽今

古相傳彩雲現江山曾識大蘇來酒邊歌舞共一笑客

裏登臨能幾回翠浪玉虹從此去明朝人在鬱孤臺

聶古栢詩云五雲閣上北風寒十八灘頭疊亂山庾嶺

一枝春信早龍泉三尺土花斑蠻烟瘴雨霜天曉畫戟

清香晝日閒倚徧闌干無限好一聲漁唱水雲間

按舊志閣在五雲驛左明天順間驛丞盧華修成化

乙未閣圮於水

羣仙閣在縣治前相傳數道士留題閣門有三仙到五雲之句後更名集仙閣元末兵燬

風雲閣在縣儒學

競秀亭在大蓼灘宋曾子與築前臨大江可覽山川之勝

通志

宋楊萬里詩云老夫上下蓼花灘每到君家輒繫船樽酒燈前山入座孤篷月裏水連天炎涼書問二千里場屋聲名三十年競秀主人文似豹不應霧隱萬峰巔宣詔亭在縣治前

魁星亭在縣儒學僅存基址

粵王臺臨大江相傳南粵王趙佗築因名

明劉玉詩云章遂江流去不回江邊今有粵王臺年深往事憑誰問春盡野花空自開落日每隨孤鳥沒好風時送片帆來登臨却喜青山在猶勝阿房化劫灰國朝胡樞詩云臺高烟鎖夕陽秋吳楚興亡一望收荒服非能修貢職漢家祇自遠懷柔雲塞兩粵關河壯露下三江木葉稠飛鳥日邊帆影亂晴波澹蕩下漁舟

黃公臺在黃公灘下漏湖坪明觀察黃又元作吉水鄒元

標記通志

黃公灘即惶恐灘詳山川志鄒元標記失載

丹桂樓在五雲洲蕭氏家丹桂一株莫究所自植相傳約

百數十年元季燬於兵雖枯根隱隱而生意泯然蕭之
彥敬修先人之德復作樓與桂相直桂之莠者復萌不
數歲鬱然識者知為蕭氏再興之徵據楊東里集

止能舍壁石傍起相夾成居崎嶇俯仰不可逼視

卧雲叅山旁一贅石高陟百丈上有卧雲叅三字

漁窟大石堵立潭深止水背負峭壁嘗有漁人炊蘆燒竹
烹鮮集飲其中

永新縣古蹟

永新故城吳立永新縣屬安成郡至隋郡廢以縣并入泰

和有故城在治西二十五里

郡志作三十五里
縣志作三十里

搗石在縣北四十里平原村廣四尺長倍之相傳唐顏真

卿為吉州司馬行部過此撫石而憩謂可搗衣扣之聲
音清越真卿五世孫詡為永新令遂家焉明裔孫琦作
搗石清隱堂羅玘記

記云搗石顏氏永新大宗以搗石清隱名其堂而走其
子璽求記於予者隱君琦也搗石者相傳魯公刺吉時
得異石於永新用以搗衣比召為御史石隨而亦以搗
徹於禁中元宗取試之無聲也復歸之公聲如初公後
五世孫永新令求石所出家焉而搗石之顏始此人以
公故也率不敢蹈且藉豪奪吏不敢舞手以臨盜之過
也不敢窺其門顏故得日以大而蔓延為北郭之宗君
北郭之英也予未得至其處謁君意永新當衡柳之麓

山之虎蹲人立與泉之雪飛雷響貢奇獻媚於穹堂華
屋間者四環而集搗衣石卧之地無見也然顏為魯人
非茲石也永新烏有顏氏哉石非遭公手則雖於此日
發千砧盡和氏之璞也亦不過與歌姬舞女流轉於富
貴之家為玩具耳矧搗衣之麤厲者乎且使茲石也搗
於公家有聲若是焉移而搗於禁中亦有聲若是焉則
徒克上方一物而已了無著於公也公之子孫雖令永
新會代而歸宜矣又從而家之其得為智乎搗石今雖
有顏氏正與編氓等君而以搗石名吾詬之矣惟其喑
啞於萬乘而獨見聲於公石亦靈矣哉有若真能別白
夫忠臣暗主幾微禍亂之萌與昔之言於晉者類也而
特非妖耳然則茲石之祥於顏明也凡天下之顏當知
重之矧居永新者乎若君者可謂知所重而不忘世守
矣非汨汨於山泉間隱者也清秋月夕魯公有靈其亦
來降斯堂而試聽搗聲乎宜為之記君之有齒有德為
鄉大賓他善若雨霍也進士王仲信李用獻方日與大
夫言之予可畧也不書

龍溪二字在禾山龍門石壁上唐顏真卿書

國朝李紱詩云平原垂勁節柔翰識心傳正直神丁守
精靈鬼斧鐫摹嘆肥轉失鈎惜笨相懸化劔虛求水亡
珠忽在淵猊應奔抉石龍直欲跳天掃壁悲陳迹臨池
感昔賢漏痕青蘚滅釵脚紫藤纏興廢誰當測高低孰

與遷陳倉泥半落鄒嶧火都然不畏驚雷妬槌崖紙搗
干

姚公石室在縣西北百二十里禾山足有石室豁然洞開
有大澗濶數丈泉流湧出可以行舟不知所極唐姚崇
布衣時愛其殊狀卜居讀書今遺址松竹猶存

本寰
宇記

墨莊二字在縣西六十里龍田宋岳飛書

國朝朱軾記云北宋劉幾顏其書室曰墨莊厥後忠武
岳侯討楊么道經新邑駙馬劉景暉餉師三日景暉幾
同支也忠武書墨莊二字遺之劉氏子孫勒諸家廟摹
石而流傳之世人爭寶重焉夫忠武之勤王忠也景暉
之餉師義也劉氏子孫世守忠武墨蹟世之人共寶之

忠義之不可磨滅也如斯夫

國朝張士琦詩云忠武千秋烈湖湘八日平當時旋虎
節此隊駐蜺旌壁壘椎牛饗貔貅按轡行二難皆不朽
墨寶日星明 駙馬園林勝將軍筆墨酣風流遙可挹
忠義嘿相參主敬蹤明道精思續世南後賢堪慎守彌
勒敢同龕

眠竹在縣北二都相傳宋隱士曾庭堅遇方外人談元於
此久之各倦思卧遂覆篠竹寢其上竹遂眠生至今
劉楚公宅在後隆山前世傳唐相姚崇嘗寓此後相牛僧
孺母子自柳衙間避寇來復求姚故地居焉至宋相劉
沆父素即故址築臺曰聰明而宅其下後沆母夢衣冠

丈夫稱牛相公來遂生沆蓋三相皆興於此故至今名其鄉曰相鄉

按劉楚公宅通志作聰明臺而辨劉素築臺之誤其原文云能改齋漫錄國史劉沆列傳曾南豐撰云沆吉州永新縣人曾祖景洪事楊行密為江西牙將有彭玕者據州稱太守脅景洪附湖南偽許之復以州歸行密遂不仕嘗謂人曰我不從彭玕當活萬餘人後必有隆者因名所居山曰後隆山山有唐牛僧孺讀書堂故基即其上築臺曰聰明臺沆母夢牛相公來而生沆予按江南野史彭昌傳云初唐相牛僧孺其祖遠仕交廣罷秩還至郴衡間為山賊所標掠惟

僧孺母子獲存遂入江南止於廬陵禾川縣之北有山名絮芋源下有古臺古老傳為聰明臺其下有湧水曰聰明泉僧孺乃舍其上而肄業迨十數年博有文學會母死遂葬於縣之西南才德鄉大學里既隨計長安擢上第不十數年累秩相輔時彭昌四世祖居於僧孺母墓之側應諸科舉至京師僧孺聞而引與見問其墳陵彭氏幼而不知默不能對及歸為修其塋會僧孺罷相鎮襄陽未幾暴薨故其墳未曾封至今本縣圖經俱載聰明泉側有牛相讀書堂遺址尚存野史本吉州人龍袞所撰或得其真今沆傳以祖景洪即其上築臺曰聰明臺誤也

鳳凰臺在縣北濠池中宋縣令梅玘築相傳臺成適祥鳥至因名今遺址尚存

和豐樓宋淳熙初縣令邵村建今廢

興文閣在舊學後宋令柴必勝建

詳學校

一經堂在縣東南宜春簿譚微仲作堂業書以教其子四人因名

三相堂在縣北禾山羅漢洞側以唐姚崇牛僧孺宋劉沆

皆嘗游學其間故名宋龔源有記

載縣志

聚喜亭在縣外亭臨江水宋政和間大旱縣令侯彭老禱雨得應邑人作亭識之

侯仙亭在縣西三十里宋縣令侯彭老治邑有惠政去後

民思之作亭以候其來因名

無盡藏堂在永新縣東郭外十里橫江張司馬德堅作堂

於其處題曰無盡藏楊萬里記

失載

水窻在永新縣西宋末劉友益居之

八磚血影在學宮內宋譚烈婦趙氏抱嬰兒避元兵兵欲

汙氏氏怒罵殺氏及兒血濺八磚至今有婦抱兒影

國朝賀貽孫記畧云宋季永新鄉進士彭震龍帥八姓

忠義從文信國勤王信國兵敗震龍猶固守永新同邑

叛人劉槃者初仕宋為大將降元引兵屠城震龍等皆

死之是時譚婦趙氏夫婦聞變抱其三歲兒隨舅姑匿

學宮元兵至殺舅姑及其夫欲汙趙氏趙氏憤甚抗聲

大罵賊怒殺之并刃其子血流聖殿八磚若婦人抱嬰
兒狀時元至元十四年七月十九日也有屠者伏梁上
出為人言甚悉久之有司謁學宮見血磚滌之不去磨
以砂石又不去復煨以猛火乃更鮮明其後明季知縣
某以歲久磚壞築土和灰石以墁之其厚三寸須臾血
痕出墁上如前狀至 國朝順治庚子知縣王登錄復
加墁焉厚倍於前墁血痕復出新墁上如前狀時已閱
三朝四百餘年矣余乃覩八磚而愾然嘆也方元兵之
下江南也駃騠騰雲旌麾蔽日雷轟電掃海沸山搖豈
非一時蓋世之雄哉然何以力足以斬炎宋磐石之宗
而不足以折閨閣芳烈之氣勢足以遏錢塘滔天之潮

而不足以滅升斗濺地之血威足以屈二百州厥角稽
首而不足以禁一婦人切齒咋舌則是江南已亡豪傑
已死而趙氏之心獨不死也夫惟趙氏之心不死是以
趙氏之血不磨遙想其時慷慨之情憤罵之狀蓋已震
天地哭鬼神貫金石而薄日星矣八磚淋漓豈偶然哉
若所謂叛人者不但人骨俱腐并其子孫亦自削其家
譜名字以滅人耳目獨此八磚殷殷斑斑輝耀學宮千
秋萬世傳之無窮然後知彼時幅員之壯兵威之強以
八磚視之不過劍首一啖蜉蝣一瞬而已後之人過我
宮牆徘徊八磚之間其尚蹶然動心也夫
明解縉詩云倉卒攜孤值亂兵血痕入土煨還青家亡

自信生無益命絕誰知死有靈江上孝娥沉骨冷嶺頭
貞婦墜魂醒何如禾水芹宮畔千古穹碑為勒銘 朱
袞詩云煙塵漲天天失色大事已去誰為力一婦綱常
誓不移八磚肝腦同嬰兒舅死汝姑死汝妾不死汝死
何所當時若失梁背人死後誰傳絕時語譚家婦趙家
女姓可易鼎可舉神不為辱志不為沮罵賊那辭干刃
加灑血已得八磚許 國朝李紱詩云杏花堂殿春風
冷振衣下拜千秋景苔泥剝落半欲昏青碧模糊猶可
省世遠驚嗟舊事竒臨危想像貞心猛但識三生重恩
義何知一死憐要領芳魂不化血留蹟髣髴嬰兒抱娘
頭嶺天正氣散成霞入地丹心凝作井自染青泥託劒

光豈緣紅粉留妝靚陰風燐火夜煌煌遙參日月同光
景當年神州盡陸沉區區八磚寧足逞山河破碎承
愁此中一片猶完整即今朝市更三遷玉琰金甌何處
求神呵鬼守獨不壞汗青斑管誰當秉欲持尺土望文
山大節精忠雙耿耿

環溪亭在學士里官道旁明尚書尹臺建

石潭林屋明劉定之父所居石潭之濱林木蔽虧屋於林
下故名

永寧縣古蹟

古縣城在縣西城下初析縣時所建至正丙戌燬於兵今
址猶存

八仙臺在縣治西十五里周侯廟前平野中秀聳八臺其頂平曠各高十丈相傳昔有人耕其下忽雷雨晦冥遙見八人自雲端下忽不見鄉人疑為八仙故名

鄭溪井在縣城西隅相傳邑陳氏嫗家貧傭人墾地種桑蔴一日有士自言姓呂至嫗家覓湯嫗於半里外汲水烹茶待之士問取水何遲曰無井因取碗覆米於地謂嫗曰我去七日開此有水士忽不見嫗如期開視土陷泉湧味甚甘美故名

金馬臺在縣蕉陂濱江有巨石高廣方平水環其下相傳有山人乘金馬越此行迹留焉遂名知縣陸時雍大書金馬臺三字勒諸石復建亭其上後圯康熙己亥蕉陂

尹氏復建知縣陶必達顏曰文漪亭并記

詳縣志

國朝邑令陳欲達詩云競傳回紇產金駟飛入寧陽關

玉花駿骨至今埋嶢石冽泉猶自浴流霞燕臺往矣漫

輕價冀野空時仍出洼留此遺蹤荒草裏他年展足騁

龍沙 費廣詩云天駟何年別渥洼清流曾洗汗駒花

石間雙跡苔痕沒潭畔崇祠古木遮流水有聲將遠恨

清溪無影見平沙一從荒塚埋龍骨首偕空餘幾歲華

林旗峰詩云金馬何年出潭光影動搖海鰲分巨擘

天駟下青霄野老能來此山靈或見招春風不相負况

復值花朝

羣玉隱居在縣西小玉笥山孟賓于湖湘連上人歸南唐

授豐城主簿遷塗陽令致仕隱於小玉笥山自號羣玉峰叟

廬陵縣坵墓

南唐屯田郎歐陽儀墓在桐木官山修伯祖

按縣志誤載偃墓今更正

宋祭酒劉玉墓在永福鄉四十三都上方石門寺後其裔孫劉子俊劉洙死義俱招魂右祔有文隆子石門阡表學士胡銓墓在七十五都天梁山

叅議胡鎬墓在白蓮堂祖塋右兄銓志銘

丞相周必大墓在七都山斗岡

按宋史益公本傳云寧宗親篆其墓碑曰忠文耆德

之碑又容齋三筆云公相國時與同里曾崧同仕於朝嘗謂崧曰吾欲卜陰陽宅為骸骨計夜夢神人饋珍珠三斗不知是何祥也崧曰吾家有山名山斗岡此殆天以授公也即以重貨求崧崧曰吾豈以利為即許之卒葬焉

聘君王南鵬墓在宣化鄉楊萬里志銘

徵士劉大同墓在高澤鄉楊萬里志銘

監丞周必正墓在金鳳山陸游志銘

丞相文天祥墓在淳化鄉鷺湖明宏治戊申奉詔修

明魯翬記云宋丞相信國文公歿前至元壬午塋廬陵鷺湖上距今益二百餘歲矣歷年久墓漸就圯皇祖著

令令前古帝王忠賢陵墓有司所在申嚴禁令今天子
嗣服整飭舊章詔天下葺諸忠賢墓時惟巡按王御史
下吉郡侯顧福知廬陵侯費鎧亟以公墓應詔涓吉督
屬遴材畚築周垣列樹名木增卑以隆隱然肅飭宜宅
忠賢矣公裔孫承蔭詣余請記余謂公孤忠大節光史
冊勒金石昭示天下後世備矣晚生末學奈何復贊一
詞哉獨以國家追崇往哲及茲北域所以風勵四海為
臣子嘉勸諸君子又式克敬承相與效法俾公之體魄
安其憑依不忘其遠炳焉若存是誠增重於世教垂鑒
於方來嗣是而有望於後之人敬書以俟

國朝陸世楷過文信國墓詩云黃冠偶憶少陵詩方外

生還豈所期嗚咽墓前流北水寂寥壠畔向南枝殉身

柴市成仁義合塋螺川感孝慈正氣此邦常不泯九原

把臂有新知明末狀元劉同升國亡殉節其墓亦在江邊

元將士郎羅曾墓在清湖歐陽原功銘

肅彞翁墓在府學講臺下 國朝乾隆乙丑知縣錢界修

元周霆震書碑陰云吾不識盧景宣其先山東人隨父

來南父歿於官貧甚事母以孝聞一日於友生晏彞文

家閱夏道存所撰肅彞翁墓志彞文從旁嘆曰厚哉盧

景宣微斯人彞翁不傳矣昔受學於彞翁叅政全子仁

討紅巾時辟彞翁行軍叅謀全貪暴自用彞翁具員耳

戊戌城陷全奔贛彞翁義不辱約錄事張元祚同死張

降彞翁一再赴學宮井死墓讀書臺下逼近城墻閱十
有五載發卒修城景宣客鎮守軍帥歐氏大懼侵沒請
於歐令卒伍物色訪求得之草莽間棺衣悉化白骨儼
然捐歲俸白金若干改墓如禮夏先生為文以傳不朽
厚哉景宣之為人也嗚呼師道之不行久矣始學涵育
薰陶若嬰兒之望長稍識趨向即視其師如路人欺其
交游侮厥父母或僭臯比之席或彎射羿之弓固不待
死而背之也彞翁死義無後倉卒旅殞陵谷改移景宣
追悼久而益堅見諸行事難矣哉近世有避兵走死赤
日黃塵瘞道側同行者歸告其子事定令偕往收殮子
茫然置之弗問又有逃竄將出境候者出期顛踣而返

自度不能活一夕陷首空池淤泥中俯伏死稿墓池邊
其子客歸曠歲嬉笑自如彼二人者既不能免父於難
距死所可百里委棄泯滅未嘗一動其心較之景宣師
友間何啻霄壤吾故繫此於彞翁後匪徒著景宣之賢
因以警天下為人子者 錢界記畧云府治西南隅為
郡學歲久將傾郡之人公舉議修余承方伯彭公命董
其事見學右古塚碑誌已失詢之居人咸不知所自來
又數日有文水蕭韶元宰等造余室而請曰此吾祖生
公墓也舉公之生平及殉沔寇之難具以告考公之墓
於洪武壬子歲其弟子大名盧完瑄請之郡倅築於講
臺下迄今經四百餘年耳因兵燹故郡之人即莫有知

者公當沔寇之至知事之不可為遂投井欲死衆出之
三日後作詩謝衆復投井歿慷慨中有從容之度與信
國之三年無異也今信國之墓在城南百里外群山之
中規模宏廣歲有防護之典樵夫牧豎觸目生敬而不
敢侵公與信國之節同公之墓又在城隅幾至湮沒其
餘若公之節者後之人修築無力當事者又不知表著
湮沒於荒煙蔓草使忠魂飲泣者又不知凡幾矣悲夫
爰修學而修墓并立碑以為之記

廉訪蕭大登墓在下卷下馬臺

明御史曾鳳韶墓在朱口

劉唐詩云白楊蕭颯滿寒空野史哀歌意未窮誰道忠

魂無處弔汀蘭岍芷盡英風

都御史羅通墓在石鼓塘

尚書周忱墓在縣北五十里

修撰蕭時中墓在縣南六十里藤鄧橋

尚書蕭維禎墓在二十七都清源山

大學士陳文墓在縣北五十里大櫟

都御史周孟中墓在縣北三十里

尚書毛伯溫墓在真君瑞華之間石碑猶存

副使蕭椿墓在青塘大路傍碑石猶存

明賀中男過墓下詩云拜子墓前樹亦悲高軒過我更
何時垂楊池上秋來瘦記得昔年贈別離 金光弼哭

蕭憲副詩云宦達如君少誰知短旄還傷心龍井水埋
骨虎林山末路天難問修文死不閒孤兒識棗栗拈去
淚斑斑

工部侍郎曠鳴鸞墓崇禎十三年勅葬教城上市

布政司李昌祺墓在縣北三里

布政彭烈墓在延福鄉五十九都佐護鐵芒碭

尚書劉宣墓在安平鄉三十九都南塘黃家嶺

通議朱孝莊墓在宣化鄉馬嶺

都御史歐陽重墓齊祖在三腴

國朝學士張貞生墓在淳化鄉八十三都佛源菖蒲嶺

附古塚

中寧王正寢城西吳氏鑿池得甃地開視之空城甚整有

石置上座題曰中寧王正寢

按古封建無中寧王邸此者疑晉宋間嗣封雖史亦
闕也

石函宋建炎二年廬陵城圯大守楊淵興役理之工掘土

數尺得石函函朽骨旁有鐫役徒聚觀或以告淵淵令

取鏡洗視之其背有文曰唐興元之初仲春巳日吾季

愛子役築於廬陵殞於西壘之垠未卜窆於他所就瘞

於西壘之巔吾卜斯土後當大德九五之間世衰道敗

喪亂之時浙梁相繼章貢邦昌之日吾子亦出於是邦

東平鴻工決使吾季愛子聽命於水府矣京兆逸工深

甫記淵覽而異之急遣問石函所在役夫以為不利棄之江矣

見曾氏雜志

蓮花廳坵墓

唐縣令賀憑墓在礮西鄉六都良坊村
副使顏廷梧墓在礮西鄉八都梅洲村
宋忠烈吳希奭墓在上西鄉二十八都中村勤王臺側
元提舉李祁墓在礮西鄉十九下都雷公山
明教諭賀守約墓在礮西鄉六都良坊村
御史江玉琳墓在礮西鄉二十都舊屋村
主事劉元卿墓在上西鄉二十五都南溪村
太守劉吉贊墓在上西鄉二十六都

解元劉渤墓在上西鄉二十三都

教授李嗣晟墓在礮西鄉一都

泰和縣坵墓

後梁防禦使盧光稠墓在縣西十里越王臺東昔有盜發其墓烏蜂紛出懼而止亦見贛州府志

宋宣惠王錢惟濟墓在南岡洗馬池錢俶第七子

忠愍曾如驥墓在上總坑

神童鄧有興墓在盤古山明楊士奇立石墓道

元集賢學士達禮墓在縣署後危素志銘

知州郎祐墓泰定間卒於官州人蕭貴營墓於龍洲上明萬曆六年知縣唐伯元清復侵地

劉霖墓至正間避地泰和卒葬珠林蟠溪楊士奇立石
主簿楊介墓在千秋鄉螺湖劉楚志銘
教諭劉楚蘭墓在泰和縣陳謨志銘

明尚書劉崧墓在三十八都珠林金相寺右
衡府紀善翰林纂修周是修墓在武山

少保楊士奇墓在五十七都楮園正統間勅葬

太保王直墓在十四都龍門之原天順六年勅葬

贈府尹張士美墓在大廟前

布政蕭暄墓在高壠勅葬

工部尚書蕭禎墓在櫪塘

侍郎曾翬墓在三十九都周塘縣南小馬坑何喬新撰神

道碑銘

侍郎張達墓在楓山

侍郎龍文墓在五十四都大塘尾勅葬

尹文和墓在城頭嶺

少保陳循墓在羅仙塘

封學士尹奐重墓在高龍洞

侍郎陳宜墓在五十七都夢陂橋勅葬

工部尚書歐陽鐸墓在武山

副使蕭翀墓在泰和縣梁潛志銘

贈尚書陳鳳梧墓在車家田勅葬

尚書羅欽順墓在桃岡 國朝雍正二年給帑修理

侍郎歐陽塾墓在官溪嶺勅葬

府尹歐陽誥墓在大園

祭酒羅璟墓在白泉山宣德間勅葬李東陽志銘

太僕寺少卿劉魁墓在四都沙村

叅政嚴頤墓在五十八都池塘嶺

嚴子容墓在四十一都新庄嶺

兵部尚書郭子章墓在井坑

少師蕭鎡墓在胡耽答橋

附古塚

甘羅墓在縣西三十里

尉遲將軍墓在縣北視岡世傳征海南旋師過此卒

衣冠塚在王山唐匡智仙昇處遺衣冠葬駕鶴峰下

仙師墓在縣東二十里岡上仙師姓王名逸

吉水縣坵墓

漢長沙王墓在仁壽鄉九都地名金牛跡有塚如山阜相

傳為漢長沙王墓或云即吳芮也宋建炎中亂卒發之

斫地尋丈見石槨皆錮以鐵不能啟而止墓下有飲酒

湖地窪以深傳云為奠酌池

隋李孝子墓在儒學內時習齋之西有隋氏連枝樹知州

費震題曰隋李孝子之墓明洪武初知縣李恒甫修構

亭墓側邑人陳宗舜記詳古蹟

後唐太尉彭玕墓在折桂鄉三十九都楓口傑原

檢校太保彭彥昭墓在折桂鄉三十一都明善里小蛇原
南唐吉州刺史楊輅墓在同水鄉六十二都鷓鴣洞西坑
楊士奇撰碑文

侍御史蕭儼墓在文昌鄉四十四都御史山
宋贈太師中書令歐陽偃墓在中鵠鄉五十三都洄陂
張伯儀墓在龍潭劉詵表

贈尚書侍御蕭定基墓在同水鄉五十六都
中奉大夫楊存墓在五十六都湓塘大夫山

贈太師楊萬里墓在同水鄉五十六都
王子俊墓在白沙山背

大理胡夢昱墓在天嶽山白茅坑

元隱士劉詵墓在仁壽鄉東槎灘危素銘

明延平知府胡子祺墓在五十二都白竹塘

尚書周肅墓在

學士解縉墓舊墓在仁壽鄉一都灞溪嘉靖四十年知縣羅
黃裳改墓東門外東山亭

大學士胡廣墓在天嶽山下永樂十六年勅墓前有享堂
少師楊士奇撰文

邑令武進錢本中墓在昭慶寺

贈侍郎周遺安墓在仁壽鄉三都雙岬宣德七年勅墓
侍郎羅汝敬墓在同水鄉六十一都桃林

都御史熊槩墓在縣東鳳凰山宣德十一年勅墓前有享

堂鳳凰橋江畔有神道碑少師楊榮撰文

侍郎錢習禮墓在文昌鄉圓塘

尚書廖莊墓在二十一都河林山

邑令昆明李智墓在仁壽鄉二都膠橋

學士劉儼墓在文昌鄉夏朗

侍講彭教墓在文昌鄉瀧岡

進士劉觀墓在鑑湖畔

方伯彭杰墓在大山陽

都御史李中墓在同江赤石潭管家坑上

邑令李楷墓在匡山麓四明沈一貫志銘

太僕卿曾直墓在六十二都龍陽岡

贈太保尚書周延墓在同江赤石潭

贊善羅洪先墓在同江赤石潭

尚書曾同亨墓在六十二都符山下勅葬

左都御史鄒元標墓在中鵠鄉白沙

祭酒劉應秋墓在仁壽鄉東槎灘

贈尚書刑部郎中李廷諫墓在仁壽鄉五都松林塘崇禎

十四年勅葬

給事中羅大紘墓在同水鄉六十二都鷓鴣洞

尚書李邦華墓在仁壽鄉六都鰲山 勅葬湖西道彭期

生督浩

尚書李日宣墓在文昌鄉濠塘瀧城墓前有專祠

殿撰劉同升墓在文昌鄉夏朗

國朝贈尚書李元鼎墓在仁壽鄉三都鶴藪

尚書李振裕墓在谷村翰圃左側

永豐縣坵墓

宋崇國公歐陽觀墓在瀧岡子修撰阡表

表云嗚呼惟我皇考崇公卜吉於瀧岡之六十年其子修始克表於其所非敢緩也蓋有待也修不幸生四歲而孤太夫人守節自誓居窮自力於衣食以長以教俾至於成人太夫人告之曰汝父為吏廉而好施與喜賓客其俸祿雖薄常不使有餘曰毋以是為我累故其亡也無一錢之積一壟之殖以庇而為生吾何恃而能自

守耶吾事汝父知其一二以有待於汝也自吾為汝家婦不及事吾姑然知汝父之能養也汝孤而幼吾不能知汝之必有立然知汝父之必將有後也吾之始歸也汝父免於母喪方逾年歲時祭祀則必涕泣曰祭而豐不如養之薄也間御酒肉則又涕泣曰昔常不足而今有餘其何及也始吾一二見之以為新免於喪適然爾既而其後常然至其終身未嘗不然吾雖不及事姑而以此知汝父之能養也汝父為吏嘗夜燭治官書屢廢而嘆吾問之則曰此死獄也我求其生不得爾吾曰生可求乎曰求其生而不得則死者與我皆無恨也矧求而有得耶以其有得則知不求而死者有恨也夫常求

其生猶失之死而世常求其死也回顧乳者抱汝而立於旁因指而嘆曰術者謂我歲行在戌將死使其言然吾不及見兒之立也後當以我語告之其平居教他子弟常用此語吾耳熟焉故能詳也其施於外事吾不能知其居於家無所矜飾而所為如此是真發於中者耶嗚呼其心厚於仁者耶此吾知汝父之必將有後也汝其勉之夫養不必豐要於孝利雖不得博於物要其心之厚於仁吾不能教汝此汝父之志也修泣而志之不敢忘先公少孤力學咸平三年進士及第為道州判官泗綿二州推官又為泰州判官享年五十有九塋沙溪之隴岡太夫人姓鄭氏考諱德儀世為江南名族太夫

人恭儉仁愛而有禮初封福昌縣太君進封樂安安康彭城三郡太君自其家少微時治其家以儉約其後常不使過之曰吾兒不能苟合於世儉薄所以居患難也其後修貶夷陵太夫人言笑自若曰汝家故貧賤也吾處之有素矣汝能安之吾亦安矣自先公之亡二十年修始得祿而養又十有二年列官於朝始得贈封其親又十年修為龍圖閣直學士尚書吏部郎中留守南京太夫人以疾終於官舍享年七十有二又八年修以非才入副樞密遂參政事又七年而罷自登二府天子推恩褒其三世故自嘉祐以來逢國大慶必加寵賜皇曾祖府君累贈金紫光祿大夫太師中書令兼尚書令曾

祖妣累封楚國太夫人皇祖府君累贈金紫光祿大夫
太師中書令兼尚書令祖妣累封吳國太夫人皇考崇
公累贈金紫光祿大夫太師中書令兼尚書令皇妣累
封越國太夫人今上初郊皇考賜爵為崇國公太夫人
進號魏國於是小子修泣而言曰嗚呼為善無不報而
遲速有時此理之常也惟我祖考積善成德宜享其隆
雖不克有於其躬而賜爵受封顯榮褒大實有三朝之
錫命是足以表見於後世而庇賴其子孫矣乃列其世
譜具刻於碑既又載我皇考崇公之遺訓太夫人之所
以教而有待於修者並揭於阡俾知夫小子修之德薄
能鮮遭時竊位而幸全大節不辱其先者其來有自熙

寧三年歲次庚戌四月辛酉朔十有五日乙亥修表
明曾大本遊瀧岡記云陳伯子為余言昔永叔仕於朝
既作龍岡阡表伐石鐫於汴京載舟而旋一夕艤彭蠡
夢神人告曰吾馮夷長也願得瀧岡阡表一寓目焉詰
旦中流石尤為亂舟且覆者數矣眾益恐懼永叔憶神
人所告舉碑以沉舟遂亡恙泊永叔歸瀧岡會黃魯直
為邑西昌聞其事以文投諸水濱而檄之居無幾碑出
於瀧江山之隈傳有龜負之而至焉此則烏龜塘所繇
名也余始以伯子之言妄誕耳其後如瀧岡視其碑龍
文宛然視其檄矢音條達所謂烏龜塘者水不渝尺歲
旱不涸雨集不盈人無敢下視者雖投一羽莫能載焉

即溺水不但絕影也豈有妄誕如陳伯子哉余跡其事則誠甚怪然則不語怪者非歟蓋其實未嘗怪也如以怪則大禹視螟蛉昌黎馴鱷魚豈其誣哉實有以致之耳永叔為其親孝矣魯直為永叔以及其親信矣孝乎親信乎朋友所以致此者誠也至誠動物無足怪者伯子曰噫有是哉於表而見永叔於檄而見魯直二妙備矣吾子從而記之罔俾二妙專美有宋不成瀧岡之鼎立乎余曰惡是何言也聊志余所見耳安敢唐突乎二妙

按阡表立於熙寧三年文忠以熙寧五年卒山谷以元豐三年知西昌是山谷為邑時去文忠之歿已九

年矣此見於文忠年譜泰和縣志及他紀載之文皆有明據此云永叔歸瀧岡會黃魯直為邑西昌已屬無徵而檄碑之事尤涉妄誕以檄文為世共傳白志載有此記姑存之并識於此

江西通志跋

明邑人羅倫詩云秋日微涼草樹悲此情堪與故山離蘇黃人物從頭數周邵風流雅未知野老自然償伏臘東風無計奈糠粃馮君莫唱滄洲曲一淚斜陽灑卧獅西傾一極論今悲潁上方歸思欲離古樹碧圓山欲斷小窻虛白月先知滄江已老三秋髮太古風清萬國

粃暮雨無言翁仲泣淡烟荒草對殘獅戶部侍郎董敦逸墓在樂安縣雲蓋鄉

尚書監丞董良史墓在樂安縣雲蓋鄉
奉議郎曾元忠墓在睦陂屋後

安撫使羅開禮墓在本邑二十八都白湖山

元翰林直學士曾德裕墓在本里龍家頭

叅政劉鶚墓在吉水縣仁壽鄉三都天柱峰

贈禮部侍郎襄敏曾榮墓在本里富坑

明秦府正史鄒朴墓在本邑二十一都舍坑

贈大理寺丞鍾同墓在本邑十七都閩田嚴陂墩

贈諭德文毅羅倫墓在栗園

太常卿郭汝霖墓在二十七都古縣營下崇禎甲申遷葬

三十四都鰕塘

少保聶豹墓在縣五都隆慶初勅葬大學士徐階撰銘

國朝檢討御史陳學海墓在十八都秋田

古墓附

幽王墓在鷄籠山下宋時覘有異氣命掘之其塚遂廢

按名勝志及林志俱載幽王墓獨安志改為煙王不

知何據仍從其舊

鄴將軍墓在縣南鄴嶺下相傳為五代時彭玕將

安福縣址墓

漢孝子歐陽寶墓在城南二十里

寰宇記作
縣南七里

按永豐志作歐寶無陽字或作安成人一作南北朝

人

晉會稽王司馬道子墓在城南晉桓元徙道子於安成元興元年九月至平都十二月晦醜之葬此一作縣東

孝子苻表墓在縣南四望岡太元中表年十六因母姜氏疾一慟而絕太守表其墓寰宇記

安成侯桓修墓在城南青岡元興中桓元以弟修為安成郡王卒葬於此元至正間盜發之

宋彭城王劉義康墓在縣南元嘉二十二年免義康為庶人徙安成二十八年賜死以侯禮葬城南南史

唐安成令劉像墓在密湖白馬峰其孫偁南唐間為安福主簿後祔葬於此

南唐柳國公周廣墓在翔鸞鄉六十都尚李後主煜梅花

公主其墓與楊梅岡相近

宋余陵丞王庭珪墓在城北清化鄉

博士王斐墓在城南青岡蘇轍撰志斐通志作斐

歐陽斗南墓在城南十里下路沙塘茨湖之原

永州教授劉安世墓在循化鄉封紫嶺

著作郎劉弇墓在城西

居士劉元弼墓在秀峰之西王庭珪志銘失載

太學生王炎午墓在城南汶源六石湖通志作六里湖

明主簿潘樞墓在城南王直有銘

祭酒李時勉墓在城南黃牛嶺

上元令孝子伍洪墓在本里荷溪

侍講劉球墓衣冠墓在城西徐潭

御史張洪墓在十都官源山

侍郎李紹墓在下村金鷄嶺明成化間勅葬

贈尚書趙敏墓在北鄉楓塘

南雄知府劉實墓在翔潭

祭酒吳節墓在城西明成化間勅葬

大學士彭時墓在城南浮山明成化間勅葬

太子少傅彭華墓在早源山明宏治間勅葬

左都御史張敷華墓在洪陂山

贈尚書孝子趙常墓在四都石灰橋孫宗發祔

都御史歐陽旦墓在牛婆嶺明正德間勅葬

都御史王懋中墓在舟湖明嘉靖間勅葬孫瀛臺祔葬在

水次倉右

副都御史伍符墓在梅溪明嘉靖間勅葬

侍郎劉丙墓在赤岡山明正德間勅葬

贈太保趙璜墓在五十二都花洲邊水北廟前明嘉靖間

勅葬

雲南按察使劉鈺墓在黃土尾

都御史周煦墓在城西楊村橋明嘉靖間勅葬

尚書彭黯墓在谷原

尚書王學夔墓在四都野狸凹明萬曆間勅葬

尚書王學益墓在陳鄉灌橋

尚書歐陽必進墓在東鄉三都

常州倅彭簪墓在灌橋

廣東參政劉鉞墓在社背

贈尚書王稼墓在上州園

侍郎諡文莊鄒守益墓在北鄉二都小嶺

明鄧元錫拜東廓先生墓詩云再過青山宅高原空有
碑暮雲深宿草斜日下淪漪嶽瀆精靈在雲林訪業遲

金針千載秘一語豈勝思

福建道御史劉陽墓在福車真武山

布衣劉文敏墓在三舍水口山

御史劉臺墓在谷源

贈大理少卿傅應禎墓無攷

太常卿王時槐墓在四十都厚里

洗馬鄒德溥墓在齊雲山

侍郎鄒德泳墓在十都徐潭

侍郎朱世守墓在豐源

揚州知府劉鐸墓在心田

都御史謝應祥墓在北鄉長陵陂

周忠蕭鼎瀚墓在邑之石屋

僉事鄒德涵墓在北鄉琴陂坑

國朝永昌知府伍柳墓祔塋本里荷溪

侍講學士康五瑞墓在南鄉四十五都冷水深山

龍泉縣坵墓

唐征南將軍高瞻墓在三十四都下鑿元微之撰神道碑
猶存

南唐柴節度使克貞墓在三十二都羅團
龔神祖墓在縣南田塢

宋郭知章墓在十二都光化鄉柏樹下

義阡附

元彭氏義阡在縣七都零溪至正癸巳羅邦之亂彭文遠

兄弟子姓十九人倡義禦賊俱被害其從曾孫彭嶷置

主招魂墓此學士王直表之

通志王文端集

萬安縣坵墓

宋尚書許貴墓在受口灣山下

祭酒許富墓在皂徑口

通判劉四愚墓在泰和縣浩溪劉家山

侍講許珂墓在田源大漚窩

萬安縣丞劉功甫墓在坦石坪

孝子葉之茂墓在橋坑山

按舊邑志坵墓一門獨缺或謂無關風化不知從古

坵墓或樵採有禁或過而生哀動人觀感即風化攸

關不容沒也攷萬安自宋置縣宋代坵墓至今可稽

如劉功甫為萬安丞因家其地舊志稱其子孫繁衍

名士輩出溯本之論正好善之公坵墓所在誠不可

缺今據縣查覆核其姓氏曾見舊志人物傳者均依

次增入

元孝子李潮王墓在雙龍山

布衣劉昭年又名懋墓在一都蕭家坑

布衣朱如初墓在西塘上坑

舊邑志劉昭年朱如初皆入明紀按劉昭年為明初

尚書劉廣衡之祖朱如初為明初副都御史朱與言

之父皆生於元代文學重一時朱如初雖明初尚存

觀楊士奇所贈詩云甘依泉石老不應棟梁求可想

見其高尚矣今改編元人墳墓中

明尚書劉廣衡墓在一都楊梅山

副都御史朱與言墓在龍泉九都橫山

孝子授知府朱與文墓在墨筆湖

義士授主事匡思堯墓在六都上墟

尚書劉孜墓在楓林坪

贈司空朱祖貴墓在東門外五岡

左布政劉挺墓在楊梅山

左右布政周鐸墓在雲洲鑼鼓山

左布政劉喬墓在崧陽

尚書諡端毅劉玉墓在十都高坪

尚書朱衡墓在雙龍

提學副使朱麟墓在鳳山

知縣周奎墓在虎邱坡頭

侍郎劉慤墓在胡坊原

贈中憲大夫朱運用墓在本村秧田

布政使周賢宣墓在蒼背園

員外郎劉愆墓在楊梅山

都運使劉憲墓在旗塘架

光祿寺丞朱維京墓在水北洲

按察司副使朱道相墓在缸頭坑

國朝主事朱錫鬯墓在水西

永新縣坵墓

唐丞相姚崇母墓在縣學東三十步許塚記

丞相牛僧孺母墓在縣西南三十里才德鄉

按通志云江南野史彭昌傳謂僧孺母子寓居廬陵

母卒塋縣之西南才德鄉乃入長安權上第不十數

年累秩輔相未幾罷鎮襄陽暴卒故其墳未曾封云

又按杜牧所撰僧孺墓志除河南尉拜監察御史丁

母夫人憂大中二年薨於東都城城南則野史所載母

死於僧孺未第前與襄陽暴卒者皆誤也

鄱陽侯尹濯墓在縣北三里

大理評事龍况墓在義山鹽堆

南唐大理卿蕭儼墓在禾山下

縣令顏詡墓在縣北八都溫塘縣志作顏詡妻孔氏墓

宋丞相劉楚公沆墓在縣北七里通志作十里宋仁宗御篆思

賢之碑碑陰有楚公遺像又有御製挽詩碑

詩云早富經綸業中成輔弼功立朝無黨勢為國盡公

忠此日悲遺直誰人嗣匪躬深嗟亡一鑑何以慰予衷

刺史張鋼墓在縣北十里周必大撰墓表鋼通志作綱

元提舉龍雲從墓在縣北後嶺

明尚書諡文安劉定之墓在縣北五里成化間勅葬吏部

尚書彭時撰神道碑兵部尚書商輅表

贈侍郎劉髦墓在石潭上

給事中李鈞墓在五都

右都御史劉敷墓在義山上天嶺下明宏治八年勅葬

尚書尹臺墓在城北鳳凰山明萬曆九年勅葬吏部尚書

曾同亨撰神道碑禮部尚書董份撰銘失載

鹽運使劉夢詩墓在本都圍中

刑部尚書王槩墓在畫角灘

副使劉光震墓在趨陂

永寧縣墓

唐節度使開國男張欽墓在四保金鰲山

宋翰林張幼杰墓在四保鳳凰嶺

卷十終

林
四
粉
鳳
凰
燄

山
四
粉
鳳
凰
燄

朱
定
錄
卷
一

朱
定
錄
卷
一

朱
定
錄
卷
一

朱
定
錄
卷
一

朱
定
錄
卷
一



